

小爾雅義證

冊全

小爾雅義證

小爾雅義證自序

小爾雅者爾雅之羽翼六藝之緒餘也漢書藝文志與爾雅並入孝經家揚子雲張稚讓劉彥和之倫皆以爾雅爲孔門所記以釋六藝之文者然則小爾雅猶是矣漢儒訓詁多本爾雅毛公傳詩鄭仲師馬季長注禮亦往往有與小爾雅合者特以不著書名後人疑其未經援及然如說文所引爾雅之魑則固明明在小爾雅矣其中如金烏之解公孫之僂請命之禮屬婦之名合符詩書深裨經謬沿及魏晉援據益彰李軌作解今雖不存而所注法言曼無邵美卽用雅訓是固足以名其學矣唐以後人取爲孔叢子第十一篇世遂以孔叢之僞而并僞之而酈氏之注水經李氏之注文選陸氏之音義孔賈之義疏小司馬之注史釋元應之譯經其所徵引核之今本粲然具存此可見孔叢本多剽取古籍而所取之小爾雅猶係完書未必多所竄亂也曩見東原戴氏橫施駁難僅有四科予旣援引古義一一

辨釋因復原本雅故區別條流又采輯經疏選注等所引通爲義證  
略存舊帙之仿佛間執後儒之訾議將有涉乎此者庶其取焉昔道

光丁亥五月朔日

小爾雅義證卷一

涇 胡承珙

廣詁

淵懿邃蹟深也

淵者說文云淵回水也荀子曰水深則回古人訓同者字多通故禮記月令淵澤井泉注云今月令淵爲深是也懿者毛詩豳風七月女執懿筐傳云懿筐深筐也楚辭逢尤懿風后兮受瑞圖王逸注云懿深也釋名云懿僂也言奧僂也奧僂亦深義大雅抑篇國語作懿毛傳抑訓密密亦深之義也文選洞簫賦注引曹大家列女傳注曰懿深邃也懿與懿聲義同邃者說文云邃深遠也水經注深水下引呂忱曰深水一名邃水考工記輿人參分車廣去一以爲隧鄭司農云隧謂車輿深也後鄭云隧讀如邃字之邃說文云邃深也玉篇云邃意思深也隧邃邃皆字異而義同蹟者易繫



辭聖人有以見天下之蹟京房許慎皆作蹟後漢范式碑張平子  
碑祝睦碑亦作蹟定四年左傳蹟有煩言賈逵曰蹟至也孔疏云  
易曰聖人有以見天下之蹟謂見其至深之處蹟亦深之義也荀  
子正名篇蹟然而不亂楊倞注蹟與蹟同蹟深也文選盧子諒答  
魏子悌詩清義貫幽蹟陸士衡演連珠是以天地之蹟該於六位  
李善注並引小爾雅曰蹟深也後漢書方術傳序皆所以探抽冥  
蹟章懷注引小爾雅曰蹟深也蹟近本誤作蹟今訂正

封巨莫莽艾祁大也

舊注封豕莫府祁寒皆言大也艾亦爲久

封者周頌烈文無封靡于爾邦商頌殷武封建厥福傳並云封大  
也文選七命蹙封豨李善注引小爾雅曰封大也案封與豐通邛  
谷風采葑采菲釋文云葑亦作豐豐有大訓故封亦爲大矣巨者  
方言云巨大也齊宋之間曰巨說文云鉅大剛也周禮鐘師肆夏  
呂叔玉注肆夏繫遏渠渠大也鉅渠巨皆聲近而義同唐釋元應

一切經音義卷三卷十卷二十五並引小爾雅曰巨大也莫者莊  
二十八年左傳狄之廣莫莊子逍遙游篇廣莫之野釋文引簡文  
注云莫大也淮南修務訓莫囂大心撫其御之手高誘注云莫大  
也史記李廣列傳莫府省文書索隱引小爾雅訓莫爲大方言云  
張小使大謂之模郭注模音莫亦此義也莽者呂氏春秋知接篇  
何以爲之莽莽也高誘注云莽莽長大貌淮南子原道訓是故不  
道之道莽乎大哉案莽與巨同訓大故王莽字巨君矣又案爾雅  
蟒王蛇郭璞曰虵之最大者故曰王蓋蟒字从莽莽有大義故蟒  
爲大蛇矣一切經音義卷六引小爾雅莽大也艾者廣言云艾老  
也爾雅釋木大而散楸疏引樊光注大者老也後漢書蘇章傳二  
輔號爲大人注云大人長老之稱艾旣爲老亦得爲大義相成耳  
祁者小雅吉日其祁孔有傳云祁大也

頒賦鋪敷布也

小爾雅義證

卷一

一中華書局聚

頒者說文云頒賦事也案頒與班通周禮大宰八曰匪頒之式司農注頒讀爲班布之班爾雅釋詁班賦也郭注謂布與廣雅釋詁云班布也張平子東京賦云布教頒常賦者大雅烝民明命使賦傳云賦布也鋪者大雅常武鋪敦淮瀆疏謂布陳敦厚之陳敷者禹貢禹敷土周禮大司樂疏引鄭注尙書云敷布也案鋪敷布三字古皆通用襄十二左傳引詩敷時繹思作鋪時繹思常武鋪敦淮瀆釋文引韓詩作敷敦淮瀆後漢書馮緄傳亦作敷敦淮瀆禹貢禹敷土山海經海內經云禹繇是始布土商頌長發敷政優優成二年昭二十年左傳俱引作布政優優儀禮聘禮管人布幕於寢門外注云今文布爲敷一切經音義卷二引小爾雅頒賦敷布也卷二十二引小爾雅頒賦布也卷二十五引小爾雅頒敷布也文選西都賦桑麻鋪棗李善注引小爾雅鋪布也

蓋戴燾蒙冒覆也

蓋者釋名云蓋加也加物上也又曰蓋在上覆蓋人也戴者釋名云戴載也載之於頭也孝經援神契曰抱戴注云在上曰戴說文云分物得增益曰戴增益者物加其上是戴與蓋義相同文選西都賦上反宇以蓋戴李善注引小爾雅云蓋戴覆也後漢書班固傳注引同燾者說文云燾溥覆照也禮記中庸無不覆幬注云幬或作燾幬亦覆也方言云藿覆也又云藿戴也郭注此義之反覆兩通者蒙者說文云冡覆也爾雅釋言釋文引小爾雅云蒙覆也冒者說文云冒冡而前也考工記玉人天子執冒四寸注云名玉曰冒者言德能覆蓋天下也

鍾崇府最積灌聚樸叢也

舊注詩灌木  
械樸皆叢義

鍾者昭二十一年左傳器以鍾之二十八年傳天鍾美於是杜注並云鍾聚也文選陸士衡君子行福鍾恆有兆李善注引小爾雅云鍾聚也據此似小爾雅此條本以諸字並訓爲聚今本皆釋爲

叢者雖二字本通疑傳寫者以聚與叢互易致誤耳崇者隱六年左傳芟夷蘊崇之僖二十四年傳棄德崇姦杜注並云崇聚也太元聚首陽不禁禦物相崇聚府者昭十二年左傳吾不爲怨府杜注云怨禍之聚廣韻引風俗通云府聚也公卿牧守道德之所聚也最者公羊隱元年傳會猶最也何休注云最之爲言聚若今聚會爲投最樂記會以聚衆注云聚或爲最史記殷本紀大最樂戲于沙邱徐廣曰最一作聚周本紀有周聚徐廣曰聚一作最文選鵬鳥賦注引鸚冠子曰憂喜聚門聚或作最最亦聚也周南葛覃釋文云叢俗作藜一本作最顏氏家訓書證篇云江南詩古本皆爲藜聚之藜而古叢字似叢字近世儒生因改爲叢解云木之叢高長者衆豕爾雅及解詩無言此者案最當從說文作叢說文叢積也最犯取也本爲二字後人多混叢爲最叢字遂廢蓋叢本有聚義故叢亦通作叢史記功臣侯者年表蓼侯孔叢索隱引家語

作最

此最字亦當作最

是也顏氏徒謂叢字似叢遂改爲叢斯不然矣文

選西征賦注引字林云叢聚貌叢與最同灌者大雅皇矣其灌其  
榑傳云灌叢生也爾雅釋木云灌木叢木又云木族生爲灌詩疏  
引孫炎云族叢也樸者方言云樸聚也楚謂之樸郭注云樸屬藜  
相著貌爾雅釋木樸枹者詩疏引孫炎云樸屬叢生謂之枹說文  
云莢瀆莢也从莘从升徐鉉曰一本注云莘衆多也兩手奉之是  
煩瀆也徐鍇曰莘叢雜也廣韻稊草生旣也說文旣草多貌是稊  
與樸義略同文選江賦注引字林云薄叢生也薄樸聲相近  
閱搜屨庀具也

閱者說文云閱具數於門中徐鍇繫傳云春秋傳曰大閱簡車馬  
也具數一一數之也一切經音義卷十卷二十四並引小爾雅閱  
具也搜者說文云搜衆意也引詩束矢其搜玉篇云搜閱也案搜  
與蒐通公羊桓六年注比年簡徒謂之蒐三年簡車謂之閱五年

大簡車徒謂之大蒐搜又與廋通禮記郊特牲注搜除處也釋文搜本又作廋周禮廋人注云廋之言數與說文閱具數義同故搜亦爲具也履疑當作展周禮充人展牲則告牲司農注云展具也禮記少儀主人展之以授使者注云展省具也庀者周禮遂師庀其委積司農注云庀具也庀通作比周禮大胥比樂官注云鄭大夫讀比爲庀庀具也錄具樂官廣雅云訛具也訛與庀同

攻爲話相旬宰營匠治也

舊注話旬未詳餘皆常義

攻者周禮瘍醫以五毒攻之注云攻治也話疑當作詰周禮大司馬制軍詰禁注云詰猶窮治也襄二十一年左傳子盍詰盜杜注詰治也相者昭九年左傳火水妃也而楚所相也杜注相治也楚之先祝融爲高辛氏火正主治火事也旬者廣雅釋詁云旬治也周禮均人公旬注云旬均也讀如營營原隰之營易坤爲均今書亦有作旬者爾雅釋訓昫昫田也釋文引字林作均均墾治也均

既爲治旬與均同故亦爲治矣宰者僖九年公羊傳宰周公何休注云宰治也春秋繁露云三代改制質文各相官曰宰故宰與相同爲治也營者小雅黍苗召伯營之箋云營治也大雅江漢來旬來宣箋云旬當爲營故營與旬同訓治匠者說文云均匠也方言廣雅並云均治也

蠲被禋屑潔也

蠲者小雅天保吉蠲爲饗傳云蠲絜也周禮宮人除其不蠲注云蠲猶潔也蠲通作圭周禮蜡氏大祭祀除不蠲注云蠲讀爲吉圭惟饗之圭圭潔也漢書陳勝傳勝故涓人將軍呂臣注云涓潔也涓人主潔除之人涓與蠲音義亦同被者說文云被除惡祭也史記外戚世家武帝被霸上集解引徐廣曰臨水被除謂之禊風俗通祀典曰禊者絜也仲春之時于水禊除故事取于清絜也禋者說文云禋潔祀也國語楚語云禋潔之服屑者邛風谷風不我屑



以傳云屑潔也

勿蔑微曼末沒無也

勿者古字與無通禮記月令毋敢詐僞呂氏春秋作勿敢僞詐孟  
子勿奪其時荀子註引作無失其時史記張丞相傳集解引高堂  
隆答魏朝訪云物無也物與勿同蔑者易剝蔑貞凶釋文引馬注  
云蔑無也案蔑與無字本通論語亡之命矣夫漢書宣元六王傳  
引作蔑之是也微者邛風式微云微君之故小雅伐木微我弗顧  
傳並云微無也曼者廣雅釋詁云曼無也法言重黎篇神怪茫茫  
聖人曼云又五百篇周之人多行秦之人多病行有之也病曼之  
也李軌注云多行由君存而有之多病由君視之如無也又寡見  
篇云曼是爲也皆以曼爲無案曼與無字亦通方言云豐蕘蕘蕘  
也陳楚之郊謂之豐鄭注坊記云葑蔓菁也陳宋之間謂之葑蔓  
之爲蕘猶曼之爲無矣又案曼蔑亦一聲之轉一切經音義引聲

類云箴蔓也今蜀土及關中皆謂竹箴爲蔓是其例也未沒者亦與蔑曼一聲之轉晉書乞伏暮末宋書又作乞佛茂蔓亦其例也隆巢岸峻高也

隆者爾雅釋山宛中隆郭璞注云隆中央高荀子禮論云高者禮之隆也巢者說文云鳥在木上曰巢爾雅釋樂大笙謂之巢太平御覽引舍人注云大笙音聲衆而高也成十六年左傳楚子登巢車以望晉軍說文作轆云兵車高如巢以望敵也又云櫟澤中守草樓也廣雅云巢高也轆櫟巢並從巢義岸者說文云岸水厓而高者大雅皇矣誕先登于岸傳云岸高位也峻者說文作陵云陵高也文選江賦峻湍崔嵬李善注引小爾雅曰峻高也

逼尼附切局隣傳戚近也

逼者爾雅釋言云逼迫也說文云迫近也尼者說文云尼從後近之爾雅釋言卽尼也郭注云尼者近也尸子曰悅尼而來遠附者

廣雅釋詁云附近也說文駙近也與附同切者易剝六四象曰剝  
牀以膚切近災也局者釋名云掬局也使相局近也又云曲局也  
相近局也文選魏文帝與朝歌令吳質書塗路雖局守官有限李  
善注引小爾雅曰局近也一切經音義卷二十五引小爾雅局近  
也文選左太冲雜詩注引尸子曰八極爲局亦以局爲近傳者考  
工記廬人重欲傳人注云傳近也釋名云扶傳也傳近之也古人  
訓同者字多通襄十年遂滅偃陽穀梁作傳陽是其證也戚者周  
書文酌解取戚免楛大戒解惠戚戚服孔彙注並云戚近也又廣  
雅云儼近也儼與戚同

邵嬾旨伐美也

邵者法言重黎篇種蠡不彊諫而山棲賢者不足邵也李軌注云  
邵美也文選潘安仁河陽縣詩令名患不邵皇甫謐豪士賦序身  
逾逸而名逾邵陸士衡演連珠是以四族放而唐劭王簡棲頭陀

寺碑身愈遠而名劭李善注並引小爾雅曰劭美也劭與邵同媚者廣雅釋詁云媚好也呂覽盡數篇甘水所多好與美人高誘注云美亦好也伐者功之美也莊二十八年左傳且旌君伐杜注伐功也公羊僖九年傳矜之者何猶云莫若我也何休注云色自美大之貌矜與伐義略同是伐爲功之美亦爲自美其功也

賢哀繁優饒夥多也

賢者說文云賢多才也呂覽順民篇則賢於千里之地高誘注云賢猶多也又謹聽篇聽者自多而不得注云自多自賢也哀者爾雅釋詁云哀多也又云哀聚也聚亦衆多之義優者說文云優饒也小雅信南山旣優旣渥釋文云說文作漫云澤多也案度尙碑持重漫於營平優亦作漫饒者玉篇云饒多也禮記曲禮不饒富注云富之言備也備而已勿多于禮也夥者方言云凡物盛多齊宋之郊楚魏之際曰夥說文云齊謂多爲夥史記陳涉世家客曰

夥頤涉之為王沈沈者索隱引服虔云楚人謂多為夥文選上林賦萬物衆夥李善注引小爾雅曰夥多也

幾蔡模臬法也舊注蔡取者龜義亦法也

幾者法言先知篇或問為政有幾注云幾要也周禮宰夫掌官法以治要案幾與畿通大學邦畿千里釋文云畿本作幾周禮大司馬注云畿猶限也釋名法逼也逼正使有所限也又案詩傳云程法也一切經音義云程猶限也程謂之法亦謂之限猶幾謂之限亦謂之法矣蔡者禹貢二百里蔡釋文引馬注云蔡法也受王者刑法而已漢書地理志顏師古注正用馬訓模者說文云模法也廣雅摹刑也刑與法同一切經音義卷二十五引小爾雅模法也臬者說文云臬射準的也呂氏春秋君守篇注云準法也說文又云墉射臬也廣雅云墉法也考工記匠人建國置臬以縣眡以景注云桀古文臬假借字於所平之地樹八尺之臬以縣正之眡之

以其景將以正四方也爾雅釋宮云在地者謂之臬郭注云臬門  
槩也康誥曰汝陳時臬東晉孔傳訓臬爲法疏云臬爲準限之義  
故爲法也

爰換變貿交更易也

爰者僖十五年左右傳晉於是乎作爰田疏引服虔孔晁皆云爰易  
也賞衆以田易其疆畔漢書食貨志曰歲耕種者爲不易上田休  
一歲者爲一易中田休二歲者爲再易下田休三歲更耕之自爰  
其處案爰田國語作轅田注引賈逵云轅易也漢書地理志秦孝  
公用商君制轅田開阡陌注引孟康曰轅爰同三年爰土易居古  
制也說文作趨云趨田易居也換者說文云換易也案換與爰聲  
相近大雅皇矣無然畔援漢書作畔換敘傳云項氏畔換黜我巴  
漢注引孟康曰換易也不用義帝要換易與高祖漢中也貿者說  
文云貿易財也文選吳季重在元城與魏太子箋古今一揆先後

不貿注引小爾雅曰貿易也又任彥昇爲卜彬謝修卜忠貞墓啓云年世貿遷注引廣雅曰貿易也案廣雅作敷不作易此亦是引小爾雅文也交者禮記坊記交相爲瘡注云交猶更公羊宣十二年傳云臣交易爲言一切經音義卷二十五引小爾雅貿交易也更者儀禮大射儀更爵洗注云更易也燕禮易觶洗注云凡爵不相襲者於尊者言更自敵以下言易更作新易有故之辭是更與易對文則別散文則通也

生造奏詣進也

生者說文云生進也盤庚汝萬民乃不生疏引王肅注云生生進進造者周禮大司寇以兩造禁民訟儀禮士喪禮造于西階下注並云造至也至與進義略同奏者說文云奏進也徐鍇繫傳引史記曰藺相如前奏缶玉篇云湊競進也公羊昭二十一年傳云賊至湊公寢而弒之湊與奏同詣者說文云詣候至也繫傳云徑

候而詣之也鄭注曲禮云古者謂候爲進

索寒探衷鉤掠採略取也

此條以索寒以下並訓爲取近本脫取字今訂正索者方言云索取也自關而西曰索寒者寒與撻同說文撻拔取也南楚語楚辭曰朝撻阨之木蘭今本楚辭作搯爾雅釋言云搯取也搯又作撻方言云撻取也南楚曰撻又曰楚謂之撻探者爾雅釋詁云探取也郭注探者摸取也說文云探遠取之也衷者商頌殷武云衷荆之旅釋文云衷或作攄謙象傳君子以衷多益寡釋文引鄭荀董蜀才作攄虞翻注云攄取也說文云攄引取也引詩原隰攄矣今小雅常棣作原隰衷矣鉤者說文云鉤曲也徐鍇繫傳云古兵有鉤有鑲引來曰鉤推去曰鑲荀子彊國篇勁魏鉤吾右楊倞注云鉤謂如鉤取物也掠者說文云掠奪取也採經典皆作采說文云采攄取也略者方言云略求也就室曰搜於道曰略略強取也案



略與掠音義同

開徹接通達也

開者文選鄒陽獄中上書雖竭精神欲開忠信李善注引小爾雅曰開達也徹者昭二年左傳徹命於執事注云徹達也釋名云達徹也接者儀禮鄉射禮兼挾乘矢大射儀挾乘矢注並云古文挾作接孟子挾貴而問注云挾接也是接本與挾通大雅大明使不挾四方傳云挾達也接又與浹通荀子解蔽篇雖億萬已不足以浹萬物之變楊倞注云浹或當爲接爾雅釋言云浹徹也

固歷彌宿舊尙久也

固者襄二十一年左傳固聞之太平御覽引服虔注云固久也久聞太子欲爲亂案固本與故通論語固天縱之將聖論衡知實篇作故天縱之將聖國語周語咨於故實史記魯世家作咨於固實一切經音義卷二十四引小爾雅固久也歷者爾雅釋詁云艾歷也

郭注長者多更歷小雅庭燎夜未艾傳云艾久也彌者說文作彌云彌久長也周書諡法解云彌久也墨子經篇云久彌異時也宿者廣雅釋言云宿留也爾雅釋詁云留久也莊子徐無鬼篇云枯槁之士宿名漢書韓安國傳云孝文寤于兵之不可宿注云宿久留也舊者字本與久通無逸舊勞于外舊爲小人史記魯世家舊皆作久說文舊鴟舊山海經海外南經湯山有鴟久大荒南經蒼梧之野有鴟久是也尙者呂覽古樂篇故樂之所由來者尙矣高誘注云尙久也

彌愈滋強益也

彌者儀禮士冠禮三加彌尊注云彌猶益也文選魯靈光殿賦歷千載而彌堅李善注引小爾雅曰彌益也愈者小雅小明政事愈蹙箋云愈猶益也說文無愈字當作逾一切經音義卷九兩引小爾雅此文一正作逾愈又通作俞國語吳語若越聞俞章韋昭注

云俞益也滋者說文云滋益也強者算法以有餘爲強有餘者益之義一切經音義卷六卷九並引小爾雅愈滋強益也

赫燁爽曉昕著讚曙明也

赫者衛風淇澳赫兮咺兮傳云赫有明德赫然燁者文選魯靈光殿賦赫燁燁而燭坤注云燁光明貌案洪範曰驛古文尙書作圉周禮疏引鄭注尙書云圉色澤而光明也方言云曙明也圉曙並與燁同一切經音義卷二十四引小爾雅赫燁明也燁近本作數今訂正曉者淮南俶真訓冥冥之中獨見曉焉昕者說文云昕旦明也日將出也一切經音義卷三引小爾雅昕明也讚者易說卦傳幽贊於神明而生著釋文云本或作讚韓康伯注云贊明也臯陶謨思日贊贊襄哉疏引鄭注贊明也言能贊明帝德案說文贊見也見有明義故訓爲明曙者說文云曙旦明也文選魏都賦謝靈運詩注並引說文作曙

階附襲就因也

階者文選南都賦高祖階其塗曹植應詔詩遵彼河澗黃坂是階  
王元長永明十一年策秀才文斯路何階人誰或可李善注並引  
小爾雅曰階因也又博奕論立身者不階其術注引廣雅曰階因  
也案今廣雅無此語疑亦是小爾雅也附者廣雅釋詁云附依也  
依與因同後漢書陳寵傳不良吏得生因緣注云因緣謂依附以  
生輕重也襲者禮記中庸下襲水土表記卜筮不相襲注並云襲  
因也就者管子心術篇就其能者尹知章注云就能而用故曰因  
也說文云因就也此互相訓

封畛際限疆略界也

封者周禮大司徒制其畿疆而封溝之注云封起土爲界也畛者  
說文云畛井田間陌也文選陸士衡五等論云封畛之制有隆焉  
爾者李善注引小爾雅曰封畛界也略者莊二十一年左傳與之

武公之略定四年傳封畛土略注並云略界也文選魏都賦故將語子以神州之略李善注引小爾雅曰略界也

承第班列次也

承者昭十三年左傳子產爭承注云承貢賦之次也國語晉語號射爲右以承公韋昭注云承次也第說文作第云第韋東之次第也禮記曲禮正義引小爾雅云第次也班者方言云班列也北燕曰班文選魏都賦班之以里閭景福殿賦侯衛之班文賦考辭就班李善注並引小爾雅曰班次也列者禮記禮運故事可列也注云列興作有次第國語周語夫翟無列于王室韋昭注云列位次也

戶悛格扈止也

舊注戶取其闔礙悛取其改皆止之義

戶者宣十二 years 左傳屈蕩戶之唐石經戶作戶注云戶止也悛者說文云悛止也昭九年傳云爲是悛而止格者漢書梁孝王傳太

后議格集注引張晏云格止也案格字古通作假爾雅釋詁云假已也已與止同廣雅云閣止也閣格聲近而義同扈者昭七年左傳扈民無淫者也注云扈止也案扈本與戶通甘誓有扈氏史記夏本紀正義扈作戶是也

幽曠暗昧冥也

幽者楚辭懷沙元文處幽兮王逸注云幽冥也曠者爾雅釋天陰而風爲曠詩疏引孫炎云雲風曠日光釋名云曠翳也言掩翳日光使不明也一切經音義卷一卷十七並引小爾雅幽曠暗昧冥也又卷二十四引小爾雅暗昧冥也

最凡目質要也

最者書中候乃拜稽首受最注云最要言也漢書嚴助傳願奉三年計最注引晉灼曰最凡要也周禮小宰聽出入以要會司農注云要會計最之簿書凡者說文云凡最括也周禮司會注契其最

凡也疏云最凡謂計要之多少以爲契要漢書霍去病傳最大將軍青凡七出擊匈奴注云最亦凡也周禮職金入其要注云要凡數也案凡近本誤作冗今訂正目者周禮箬人四曰箬目注云目謂事衆筮其要所當也周禮疏引鄭注論語請問其目云欲知其要管子君臣篇南面而受要尹知章注云要謂百吏之目也案目近本誤作自今訂正質者文六年左傳趙盾爲國政由質要注云質要契券也

疆窮充竟也

疆者豳風七月萬壽無疆傳云疆竟也案疆與竟本一聲之轉漢書賈誼傳守衛捍敵之臣誠死城郭封疆賈子新書作封境荀子可炊而鏡也注云鏡當爲僵是其例也充者方言云幅廣爲充儀禮士冠禮廣終幅注云終充也案終與竟同充幅猶言竟一幅也而乃爾若汝也

案汝本作女而乃爾若四字不獨訓女字亦皆通作女莊子外物篇召而來釋文云而本作女洪範謀及乃心史記宋世家作謀及女心小雅桑柔告爾憂恤誨爾序爵墨子尚賢篇引詩爾皆作女甘誓汝不共命墨子明鬼篇引作若不共命蓋四字以聲轉而變其實猶一字耳

控彎挽引也

控者說文云控引也詩曰控于大邦匈奴各引弓控絃文選魏都賦出控漳渠李善注引小爾雅曰控引也彎者說文云彎持弓關矢也淮南原道訓彎綦衛之箭高誘注云彎引也挽者爾雅釋訓釋文引聲類曰挽引也又云挽本作輓說文云輓引之也一切經音義卷十引小爾雅控彎挽引也又卷二十二引小爾雅控引挽也卷二十三引小爾雅彎控挽引也此皆傳寫偶誤耳

承贊涼助佐也

小爾雅義證

卷一

十一 中華書局聚



承者哀十八年左傳請承注云承佐也呂氏春秋貴信篇莊子左搏桓公右抽劍以自承高誘注云承佐也案承通作丞孝經注前疑後丞釋文云本亦作承呂氏春秋介立篇爲之丞輔注云丞佐也涼者大雅大明涼彼武王傳云涼佐也涼通作亮詩釋文引韓詩亮彼武王云亮相也相與佐同書畢命正義引釋詁亮佐也今爾雅無此文蓋卽用小爾雅而易涼爲亮以就正文爾

尋由以用也

尋者莊二十八年左傳今令尹不尋諸仇讐僖五年傳將尋師焉昭元年傳日尋干戈注並云尋用也由者王風君子陽陽右招我由房傳云由用也昭八年左傳疏引爾雅由用也案今爾雅無此文當是小爾雅也以者說文云以用也案以字古通作用呂刑報虘以威論衡謹告篇作報虘用威小雅桑柔逝不以濯墨子尙賢篇作鮮不用濯大雅板勿以爲笑荀子大略篇作勿用爲笑

要捷集載成也

要者周禮司會以月要考月成禮記王制司會以歲之成質於天子注云成計要也捷者周書謚法解捷克也春秋宣八年經日中而克葬注云克成也集者小雅黍苗我行既集箋云集猶成也載者國語周語奕世載德又天地之所載也韋昭注並云載成也

肆赴捷疾也

肆者大雅大明肆伐大商皇矣是伐是肆傳並云肆疾也赴者說文云赴趨也釋名云疾行曰趨趨赴也赴所期也禮記少儀毋報往喪服小記報葬者報虞注並云報讀赴疾之赴疏云赴猶急疾也玉篇云趨疾也廣雅云趨行也一切經音義云孚疾也案趨孚與赴皆字異而音義同捷者楚辭離騷夫惟捷徑以窘步王逸注云捷疾也說文云捷疾也廣雅僣疾也並與捷同

造之如適也

造者莊子山木篇愛己而造哀也釋文引司馬彪注云造適也之者禮記人之其所親愛而辟焉注云之適也說文云適之也宋魯語如者春秋本義引陸希聲左傳通例曰自此適彼曰如

掇督撫拾也

掇者周南芣苢薄言掇之傳云掇拾也說文云掇拾取也爾雅啜茹也郭注啜拾食之也啜與掇音義同督者豳風九月叔苴傳叔拾也叔與督同爾雅釋言云筑拾也金滕盡起而築之釋文云築本亦作筑馬鄭皆訓築拾也釋名云築篤也篤又與督通昭二十二年左傳司馬督漢書古今人表作司馬篤是筑築篤督數字皆通叔督筑築皆訓拾此以聲爲義者也撫者說文徐鍇本云撫安也一曰掇也

肄子燼餘也

肄者方言云烈業餘也秦晉之間曰肄周南汝墳伐其條肄傳云

肄餘也斬而復生曰肄案肄近本誤作肆今訂正子者方言云子餘也周鄭之間或曰子青徐楚之間曰子大雅雲漢周餘黎民靡有子遺燼者大雅桑柔具禍以燼箋云災餘曰燼成二年左傳請收合餘燼注云燼火餘木也一切經音義卷十九卷二十四並引小爾雅燼餘也方言蓋餘也馬融長笛賦云蓋滯抗絕蓋與燼同拓斥啓闢開也

拓者揚雄甘泉賦云拓迹開統太元元瑩云天地開闢宇宙拓坦玉篇云拓廣大也廣韻云拓開衣領說文繫傳引字書云拓張衣令大也方言云張小使大謂之廓張與開義相近拓廓拓皆聲近而義同斥者漢書惠帝紀注引如淳云斥開也啓者儀禮既夕記啓之昕外內不哭注云古文啓爲開儀禮士昏禮贊啓會注云今文啓爲開闢者易繫辭傳闢戶謂之乾虞翻注云闢開也費誓序東郊不開釋文開馬本作闢

杜實充物塞也

杜者一切經音義引國語賈注曰杜塞也說文云敷閉也或作劇  
廣雅渡塞也大雅絲篇度之薨薨韓詩云度填也敷渡度並與杜  
同文選西京賦述杜蹊塞李善注引小爾雅曰杜塞也實者廣雅  
釋詁云實塞也臯陶謨剛而塞史記夏本紀作剛而實充者邛風  
旄邱箋云充耳塞耳也物者海內北經禹厥之三仞三沮郭注云  
掘塞之而土三沮陷也史記殷本紀充仞宮室淮南子本經訓德  
交歸焉而莫之充忍也仞忍並與物同

實物滿也

實者小雅節南山有實其猗傳云實滿也物者大雅靈臺於物魚  
躍傳云物滿也史記司馬相如傳虛宮館而勿仞注云仞亦物也  
獎率勵勸也

獎者方言云自關而西秦晉之間相勸曰獎文選謝靈運擬魏太

子鄴中集詩客心非外獎江文通雜體詩得失非外獎任彥昇天監三年策秀才文宏獎之路諸葛武侯出師表當獎帥三軍注並引小爾雅曰獎勸也率者周頌噫嘻率時農夫韓詩作帥時農夫周禮喪祝注云勸猶倡帥前引者是率有勸義勵者廣言云勵勉也禮記月令勉諸侯注云勉猶勸也一切經音義卷二卷二十二並引小爾雅獎率勵勸也

勸勉事力也

勸者國策宋策云許救甚勸高誘注云勸力也勉者公羊宣十五年傳注云勉猶努力事者爾雅釋詁云事勤也廣雅釋詁勤劬也晉書音義云劬與力同一切經音義卷六引小爾雅勸勉力也又卷十二引小爾雅勤勉事方之見勤當作勸方當作力之貌二字誤

經屑省過也

屑者方言云屑屑不安也秦晉謂之屑屑又云屑往勞也郭注云  
屑屑往來皆劬勞也說文屑動作切切也動作往來皆經過之意  
省者方言云迹迹屑屑不安也秦晉或謂之省省郭注皆往來之  
貌也是省與屑義同案屑省既爲經過之過亦爲過失之過屑與  
洸通省與管通書多士大淫洸有辭釋文引馬本作屑注云屑過  
也康誥非管乃惟管災潛夫論述赦篇引俱作省史記秦始皇本  
紀飾省宣義注云省過也是矣

闕缺間隙也

闕者昭二十年左傳以當其闕注云闕空也缺者說文云缺器破  
也廣雅釋詁云隙裂也破與裂義相近間者昭十三年左傳諸侯  
有間矣注云間隙也文選天台賦覺涉無之有間李善注引小  
爾雅曰間隙也

迭遞交更也

迭者說文云迭更迭也文選西京賦遞宿迭居文賦暨音聲之迭  
代陸士衡答賈長淵詩降及羣后迭毀迭興李善注並引小爾雅  
曰迭更也方言云更迭代也齊曰佚穀梁文十一年傳兄弟三人  
佚害中國范甯注云佚猶更也案佚迭古字通遞者爾雅釋言云  
遞迭也書疏引李巡云遞者更迭交者禮記坊記交相爲瘡注云  
交猶更一切經音義卷十六引小爾雅遞迭迭更也迭當爲交之  
誤

燿剗沒滅也

燿者襄二十六年左傳王夷師燿注云吳楚之間謂火滅爲燿昭  
十二年左傳楚師燿注同剗者國策齊策剗而類高誘注云剗滅  
也沒者襄二十四年左傳何沒沒也注云沒沒沈滅之言

元黔驪黝黑也

黔者說文云黔黎也秦謂民爲黔首謂色黑也周謂之黎民易曰



爲黔喙文選班孟堅答賓戲云墨突不黔李善注引小爾雅曰黔黑也案說文又云黔黃黑也玉篇黠音巨炎巨今二切是黠黠與黔皆聲近而義略同驪者說文云驪馬深黑色案驪雖從馬然凡黑者亦謂之驪莊子列禦寇篇釋文云驪龍黑龍是也黠者說文云黠微青黑色爾雅釋器云黑謂之黠

縞皓素白也

縞者鄭風東門縞衣綦巾傳云縞衣白色男服也後漢書順帝紀注引小爾雅曰縞皓也案此所引疑脫白字孟子鬻鬻乎不可尙已漢書司馬相如傳鬻然白首並與縞同皓者唐風揚之水白石皓皓傳云皓皓潔白也一切經音義卷二十一引小爾雅皓白也說文云顛白兒引楚辭大招天白顛顛廣雅皤皤白也並與皓同一切經音義卷十二又引小爾雅皓素白也

彤粹緇赤也

一本緇下多朱字

彤者說文云彤丹飾也凡經言彤弓彤矢彤管彤几彤裳之屬皆是特者廣韻云特與駢同禮記郊特牲云牲用駢尙赤也說文云墀赤剛土也廣雅云煒赤也並與特同緼者曹風候人傳云一命緼芾釋文云緼赤黃色

淫溢沈滅沒也

淫者說文云久雨爲淫是沈沒之義方言云潛涵沈也廣雅潛沈沒也案潛淫聲近而義同溢者說文云溢器滿也爾雅釋詁溢盈也盈滿亦沈沒之義也沈者國策秦策不沈者三板耳高誘注云沈沒也

載功物事也

載者周書謚法解載事也文選西京賦是以多識前代之載劉越石勸進表每覽史籍觀之前載李善注並引小爾雅曰載事也功者豳風七月載績武功傳云功事也舜典惟時亮天功史記五帝

紀作惟時相天事物者大雅烝民有物有則傳云物事也

小爾雅義證卷一

小爾雅義證卷二

涇 胡承珙

廣言

晏明陽也

晏者說文云晏天清也揚雄羽獵賦云天清日晏文選注引許慎淮南注云晏無雲之處也漢書郊祀志如淳注云日出清濟爲晏明者釋名云明陽也

盱晏晚也

盱者襄十四年左傳日盱不召服虔注云盱日晏也哀十三年傳日盱矣杜注云盱晚也晏者列子湯問篇晏陰之間張湛注云晏晚暮也

算麗數也

算者說文云算數也一切經音義卷三引小爾雅算數也麗者說

文方言並作𡗗云數也徐鍇說文繫傳曰詩云商之孫子其𡗗不億今詩借麗字大雅毛傳云麗數也

𡗗艾老也

𡗗者說文云𡗗老也釋名云叟老者稱也叟縮也人及物老皆縮小於舊也艾者方言艾長老也東齊魯衛之間凡尊老謂之叟或謂之艾禮記曲禮五十曰艾注云艾老也疏引熊氏云中候運衡年耆既艾中候纖準哲仲父年艾誰將逮政注並引七十曰艾今案周書謚法解保民耆艾曰胡孔鼂注亦云七十曰艾古五字如七或諸書本作五十傳寫誤作七十但艾既與叟同爲尊老之通稱則七十亦可稱艾不必定是五十鹽鐵論未通篇五十已上曰艾老是也

僉皆同也

僉者方言云僉皆也自山而東五國之郊曰僉一切經音義卷一

卷三並引小爾雅僉同也

交校報也

交者禮記大行人歸賑以交諸侯之福注云交或往或來者也禮記樂記禮也者報也注云禮有往來往來是報復之義也校者僖二十三年左傳有人而校杜注校報也史記春申君傳足以校于秦矣

舒布展也

舒者方言云舒勃展也東齊之間凡展物謂之舒勃

揚翥舉也

揚者說文云揚飛舉也翥者說文云翥飛舉也方言云翥舉也楚謂之翥文選七啓翔爾鴻翥李善注引小爾雅曰翥舉也

索略求也

索者易說卦一索而得男釋文引王肅注云索求也禮記曲禮大

夫以索牛注云索求得而用之略者方言云略求也就室曰按於道曰略

奚害何也

奚者一切經音義引蒼頡云奚何也害者周南葛覃害澣害否傳云害何也案害與曷同書湯誓時日曷喪孟子作害喪大誥予曷其不于前寧人圖功攸終予曷敢不于前寧人攸受休畢予曷敢不終朕畝漢書翟方進傳引俱作害說文云曷何也

里度居也

里者說文云里居也大雅度之薨薨又爰究爰度傳云云度居也案度與宅通堯典宅西曰昧谷周禮縫人注引作度西曰柳谷舜典五流有宅史記五帝紀作五流有度顧命恤宅宗後漢書班彪傳作恤度宗大雅宅是鎬京禮記坊記作度是鎬京又此惟與宅論衡初稟篇作此惟與度漢書韋元成傳先後茲度注引臣瓚曰

古文宅度同爾雅釋言云宅居也周禮縫人疏云度亦居也

周浹匝也

浹者國語越語浹日而令大夫朝之韋昭注云浹匝也案浹與挾通周禮大宰挾日而斂之釋文云挾字又作浹于本作帀荀子禮論方皇周挾楊倞注挾帀也史記作房皇周浹索隱云周浹猶周帀

充該備也

充者公羊桓四年傳三曰充君之庖何休注云充備也文選謝靈運八華子岡詩恆充俄頃用李善注引小爾雅曰充備也該者穀梁哀元年傳此該之變而道之也范甯注云該備也國語吳語執箕帚以賅姓于王宮韋昭注云賅備也案賅與該同莊子齊物論賅而存焉釋文引小爾雅云賅備也

列厥陳也



廠者說文云廠陳輿服於庭也周禮司裘廠裘司服廠衣服大師帥警而廠注並云故書廠爲淫司農注云淫讀爲廠廠陳也案廠近本訛作厥今訂正

輶輶輿也

案車式較內謂之輿禮記曲禮疏云輿車牀也明堂位注云鉤車有曲輿者也疏云輿則車牀是輿爲車身受載之處也輶者漢書景帝紀令長吏二千石車朱兩輶如淳曰輶小車兩屏也說文無輶字較下云車耳反出也周禮漆車藩蔽注云藩今時小車藩此皆謂在車兩旁爲屏蔽者較藩並與輶同輶以內爲車箱廣雅云輶箱也車箱謂之輿故輶爲輿也輶者說文云輶輶也考工記輶人十分其輶之長以其一爲之當兔之圍注云輶當伏兔者也疏云當兔謂輿下當橫軸之處荀子禮論輿藏而馬反楊倞注云輿謂軼軸也軼軸有輿之名輶當軸者故亦可訓爲輿與

廢措置也

廢者周禮大宰三曰廢置以馭其吏公羊宣八年傳廢其無聲者何休注云廢置也置者不去也齊人語爾雅釋詁廢舍也郭璞注云舍放置也方言云發舍車也案發與廢聲近而義同

駕乘凌也

駕者昭元年左傳猶詐晉而駕焉杜預注云駕猶陵也文選江賦乃溢涌而駕隈七發觀其所駕軼者李善注並引小爾雅曰駕陵也案陵與凌古字同乘者國語周語乘人不義韋昭注云乘陵也收戢斂也  
戢者小雅鴛鴦戢其左翼箋云戢斂也案戢與輯同大雅公劉思輯用光孟子作戢禮記喪大記寢門之內輯之注云輯斂也

禁錄也

錄者荀子脩身篇程役而不錄楊倞注云錄檢束也又榮辱篇軌

錄疾力注云拘與拘同拘錄謂自檢束也禮記緇衣君子道人以言而禁人以行注云禁猶謹也說文遠謹也案遠與錄謹與禁聲

義並相近

掌司主也

掌者周禮千寶注云凡言掌者主其事凌人掌冰注云杜子春讀

掌冰爲主冰

偏贅屬也

偏者襄十九年左傳舉其偏杜預注云偏屬也襄三十年傳令尹

之偏注云偏佐也儀禮覲禮偏駕不入王門注云在旁與己同曰

偏凡言偏者有連屬之義故偏訓爲屬也贅者小雅桑柔具贅卒

荒傳云贅屬也公羊襄十六年傳君若贅旒然何休注云贅繫屬

之辭孟子大王屬其耆老尙書大傳曰贅其耆老

麗著思也

麗著訓思義未詳案文選吳都賦赤須蟬蛻而附麗劉淵林注引爾雅曰麗附也今爾雅無此文疑是引小爾雅近本思字蓋附字之訛

載略行也

載者堯典有能奮庸熙帝之載疏引鄭注云載行也略者隱五年左傳吾將略地焉杜預注云略總攝巡行之名宣十一年傳略基趾昭二十二年傳荀吳略東陽二十四年傳以略吳疆注並云略行也

沓襲合也

沓者楚辭天問天何所沓王逸注云沓合也文選羽獵賦天與地沓注引應劭亦云沓合也王褒洞簫賦云薄索合沓襲者禮記少儀劔則啓櫝蓋襲之注云襲卻合之淮南天文訓天地之襲精爲陰陽高誘注云襲合也

抵享當也

抵者呂氏春秋必已篇宋桓司馬有寶珠抵罪出亡高誘注云抵當也享與饗通饗又與嚮通洪範嚮用五福漢書谷永傳作饗用五福嚮有相當之義東晉古文尚書咸有一德傳云享當也正用

此訓

庚徹道也

道一本作通

庚者笙詩序云由庚萬物得由其道也成十八年左傳以塞夷庚注云夷庚吳晉往來之要道徹者小雅十月之交天命不徹傳云徹道也爾雅釋訓云不徹不道也

修舒長也

脩者方言脩長也陳楚之間曰修史記秦始皇紀云德惠脩長舒者說文云舒伸也周髀算經從東至北日益長故曰信伸與信古字通王符潛夫論愛日篇云治國之日舒以長

校戰交也

校者列子周穆王篇幡校四時殷敬順釋文云校讀作交說文廣雅並云佼交也小雅桑扈箋云交交猶佼佼飛往來貌釋名佼佼也與物交錯也佼佼並與校同戰者說文云戰接也又云接交也謁復白也

謁者說文云謁白也國策秦策臣請謁其故高誘注云謁白也復者禮記曲禮願有復也注云復白也

勅質正也

勅者說文云勅誡也一曰雷地曰勅張參五經文字曰勅古勅字今相承皆用勅案說文勅勞也與勅義別易噬嗑明罰勅法釋文引字林作勅玉篇勅誡也今作勅古字又多借飭爲勅或作飾漢藝文志引易云明罰飭法史記五帝紀云信飭百官徐廣曰飭古勅字小雅六月戎車旣飭傳云飭正也呂氏春秋舉難篇難爲非

則行飾高誘注云飾讀曰勅勅正也後漢書班固傳憐勅天命也  
作勅文選典引則作敕蔡邕注云敕正也質者周禮詛祝以質邦  
國之劑信儀禮士冠禮質明行事禮記月令莫不質良注並云質  
正也

裔蔑末也

又云博雅曰曰西收曰嫫嫫參正嫫文字曰嫫古陳平

裔者說文云裔衣裾也方言云裔末也蔑者方言云木細枝謂之  
杪江淮陳楚之間謂之蔑廣雅云嫫末也文選沈約奏彈王源嫫  
祖辱親注云嫫與蔑古字同君奭文王蔑德疏引鄭注云蔑小也  
逸周書祭公解穆王言追學于文武之蔑孔晁注云言己追學文  
武之微德微小皆末之義也近本裔作商案一切經音義云囊古  
文裔同蓋本作囊傳寫誤作商耳今訂正

延衍散也

又云延者爾雅釋詁云延陳也方言云延徧也陳徧皆布散之意衍者

延者爾雅釋詁云延陳也方言云延徧也陳徧皆布散之意衍者

文選東京賦仁風衍而外流薛綜注云衍布也案衍與羨通大雅板及爾游羨釋文羨本作衍文選封禪泐涌曼羨注引音義曰曼羨廣散也七發衍溢漂疾波涌而騰起李善注引小爾雅曰衍散也

未沒終也

沒者案說文云溲沈也物終也本二字後世物通作沒經典多作沒或又作歿廣雅云歿終也

化辨別也

化者說文云化別也王風中谷有穠有女化離傳云化別也辨者周禮小宰聽稱責以傅別司農注云傅別故書作傅辨是辨與別字本通

菲涼薄也

菲者方言云菲薄也涼者說文云涼薄也从水京聲又隹部寇事



有不善言慰也爾雅慰薄也从吳京聲案今爾雅無此文許所引當卽漢書藝文志孝經家之小爾雅蓋古本作慰字故張揖著廣雅云慰禱也亦用此文後人以慰涼通用乃改爲涼字耳

復旋還也

復者國策齊策恐田忌欲以楚權復於齊高誘注云復還也說文云還復也旋者廣雅釋詁云旋還也

祖翼送也

祖者大雅韓奕韓侯出祖箋云祖將去而祀較也儀禮既夕有司請祖期注云將行而飲酒曰祖衛風泉水飲錢于禰傳云祖而舍較飲酒于其側曰錢大雅崧高箋云錢送行飲酒也祖與錢同事故亦訓送矣翼者周書多士非我小國敢弋殷命疏引鄭本作翼注云翼猶驅也易王用三驅驅者從禽之事鄭風大叔于田傳云從禽曰送疏云送謂逐後文選注引倉頡云隨後曰驅是驅與送

義相近翼可訓驅故亦可訓送矣文選謝元暉鼓吹曲凝笳翼高  
蓋疊鼓送華輶李善注引小爾雅曰翼送也

走印我也

走者文選東京賦走雖不敏薛綜注云走公子自言走使之人如  
今言僕矣又諳蔣公奏記云下走爲首注引應劭漢書注云走僕  
也印者爾雅釋詁云印我也郭注印猶映也語之轉耳說文云映  
女人自謂我也

姓命孳子也

姓者說文云姓人所生也古之神聖母感天而生子故稱天子白  
虎通云姓者生也人稟天氣所以生者也昭四年左傳問其姓注  
云問有子否疏云女生曰姓姓謂子也命者國語周語不亦瀆姓  
矣乎注引賈唐注云姓命也禮記祭法大凡生於天地之間者皆  
曰命論衡骨相篇云命謂初所稟得而生也命與姓義略同故亦

得訓爲子也孥者小雅常棣樂爾妻孥傳云孥子也孥通作帑襄  
二十八年左傳疏云帑者細弱之名於人則妻子爲帑於鳥則鳥  
尾曰帑一切經音義卷二十二引小爾雅孥子也

諧顛和也

諧者襄十一年左傳如樂之和無所不諧周禮調人掌司萬民之  
難而諧和之顛者盤庚率顛衆感某氏傳云顛和也正用此訓

悛寤覺也

悛者襄三十八年左傳亦無悛志注云悛改寤也寤者說文云寐  
覺而有信曰寤一切經音義引蒼頡云覺而有言曰寤說文信字  
當爲言字之誤周南關雎寤寐求之傳云寤覺也廣雅寤覺也寤

夫與寤同

憾猜恨也

憾者禮記中庸人猶有所憾注云憾恨字案古字憾只作感成二

年左傳朝夕釋憾唐石經作感漢書張安世傳何感而上書歸衛將軍富平侯印師古曰感恨也猜者方言云猜恨也說文云猜恨賊也玉篇云悻恨也猜悻聲近而義同一切經音義卷二十引小爾雅憾猜恨也

艾盡止也

艾者襄九年左傳大勞未艾杜預注云艾息也息與止義同又與

攔忿也

攔者昭十八年左傳今執事攔然授兵登陴注云攔勁忿貌方言

云攔猛也晉魏之間曰攔說文憫武兇也與攔義同又木部攔大

木貌徐鍇繫傳云左傳攔然授兵登陴攔者勁忿之貌與此字同

音音疑當然則此亦木之高勁也

奸犯也

說文干犯也奸犯淫也古書亦多借奸爲干昭二十年左傳是再

奸也奸卽干字之借案文選海賦羣妖邁迕陸士衡贈尚書郎顧  
彥先詩淒風迕時序李蕭遠運命論夫忠直之迕於主李善注並  
引小爾雅曰迕犯也又阮藉五君詠詩立俗迕流議注引廣雅迕  
犯也今廣雅無此語當亦引小爾雅據此疑小爾雅本作迕不作  
奸或者以奸與迕同訓犯傳寫脫迕字耳

汨猾亂也

汨者說文云汨治水也古訓詁義有相反者故汨又訓亂也猾者  
書舜典蠻夷猾夏史記集解引鄭注云猾夏侵亂中國也猾又與  
滑通國語周語而滑夫二川之神韋昭注云滑亂也荀子成相篇  
無斂滑楊倞注云滑與汨同莊子齊物論滑疑之耀音義云向本

作汨

縮讀抽也

縮者國語周語縮取備物韋昭注云縮引也引與抽義相近小雅

巷伯傳縮屋而去之正義云縮抽也案縮卽縮也廣雅釋詁云撈

說文撈或作抽撈縮也此互相訓者讀者衛風牆有茨傳云讀抽也箋云

抽猶出也顏師古匡謬正俗云抽當爲籀籀讀也从竹撈聲撈卽

古抽字惠定字云說文籀讀書也又手部撈或从抽大史公曰紬

史記石室金縢之書紬亦讀抽也案籀本與絲通閔二年左傳成

風聞成季之絲服虔注云絲抽也抽出吉凶也方言云抽讀也此

亦互相訓也讀近刻訛作續今訂正

暨捷及也

暨者公羊隱元年傳云會及暨皆與也穀梁昭七年傳云以外及

內曰暨文選西征賦暨乎稔侯之忠孝淳深文賦暨音聲之迭代

赭白馬賦暨明命之初基李善注並引小爾雅曰暨及也捷者漢

書場雄傳鳳皇翔於蓬階兮豈駕鵝之能捷注引晉灼云捷及也

苞跋本也

苞者檜風下泉浸彼苞稂傳商頌長發苞有三蘖箋並云苞本也  
案苞通作包禹貢草木漸包釋文云字或作苞易否繫于包桑釋  
文引陸注云包本也跋者禮記曲禮燭不見跋注云跋本正義引  
小爾雅云跋本也案說文云芟草根也中山經云青要之山有草  
焉其本如橐本西山經云臬塗之山有草焉其狀如橐芟郭璞注  
上林賦云橐本橐芟也草本之爲芟猶燭本之爲跋矣

肆臬極也

肆者說文云肆極陳也昭十二年左傳昔穆王欲肆其心杜預注  
云肆極也論語古之狂也肆集解引包注云肆者極意敢言之也  
爾雅釋言肆力也郭注云肆極力此皆以肆爲極也臬者康誥疏  
云臬爲準限之義昭十二年左傳貢獻無極疏云極謂限極臬有  
限義故又訓爲極也漢書司馬相如傳弦矢分莛壹什文穎注云  
所射準的爲莛莛與臬通文六年左傳陳之莛極

睇題視也

睇者說文云睇目小視也南楚謂眇曰睇方言云睇眇也陳楚之間南楚之外曰睇易明夷夷于左股釋文引鄭注作睇云旁視曰睇題者小雅小宛題彼脊令傳云題視也箋云題之爲視睇也禮記大學顧諟天之明命注云諟或爲題東都賦弦不睇禽轡不詭遇注引說文云睇視也廣雅作不題禽不詭遇

犯肆突也

犯者國語周語其語犯韋昭注云犯陵犯人也荀子王霸篇汗漫突盜以先之楊倞注云突謂相陵犯也肆者大雅皇矣是伐是肆傳云肆犯突也文十二年左傳若使輕者肆焉周禮疏引舊注云肆突也

束縻縛也

縻者說文云牛轡也案縻與靡通易中孚吾與爾靡之釋文云靡



本作縻荀子正論藉靡繹舌楊倞注云靡繫縛也

肆從遂也

肆者周禮肆夏呂叔玉注云肆遂也大戴記夏小正狸子羴肆傳亦云肆遂也從者文選嵇叔夜與山巨源絕交書注引國語賈注從遂也又閒居賦注引聲類云遂從意也禮記樂記率神而從天注云從順也周書常訓解云順政曰遂案遂近本訛作逐今訂正放投棄也

放者說文云放逐也淮南修務訓放驩兜於崇山高誘注云放棄也投者方言云凡揮棄物淮汝之間謂之投小雅巷伯投異豺虎傳云投棄也

莽蕪草也

莽者方言云莽草也南楚曰莽蕪者說文云蕪也呂覽任地篇大草不生高誘注云草穢也案蕪本草穢而訓爲草猶萊說文云耕

多草也而廣雅則云萊草也是其例文選顏延年秋胡詩白露生庭蕪李善注引小爾雅曰蕪草也

暴映曬也

近本曬也下有焮也二字案本書無此文例今改歸下條

暴者方言云曬暴也凡暴五穀之類秦晉之間謂之曬一切經音義卷二引小爾雅暴曬也又卷二十二引小爾雅暴乾也按下文云煇乾也此所引乾字當爲曬字之誤映者文選王仲宣詩注云映猶照也又引通俗文云日陰曰映梁元帝纂要日在午曰亭在未曰映漢書賈誼傳日中必斐注云斐謂暴曬之也顏氏家訓書證篇云言日中時必須暴曬日在午未爲正中故映訓爲曬與

焮晞也

近本以焮也連上爲句晞字屬下爲句今訂正

焮者昭十八年左傳行火所焮杜預注云焮炙也焮亦作炘玉篇云炘與焮同炙也焮也說文昕且明日將出也徐鍇繫傳云昕猶焮也日炙物之貌說文又云昕讀若希是焮與晞亦一聲之轉耳

煇乾也

近本作晞煇乾也今訂正

煇者玉篇云煇亦晞字秦風蒹葭白露未晞傳云晞乾也

迪迹蹈也

迪者爾雅釋詁云迪道也道本與蹈通荀子禮論道及士大夫史記道作蹈是也迹者楚辭天問昏微循迹王逸注云迹道也迹通作蹟爾雅釋訓不蹟不道也

衍演廣也

近本廣下多遠字又選西征賦注引演廣遠也案本篇無疊二字爲訓釋之例今據七啓注引演廣也爲證刪遠字

衍者易繫辭傳大衍之數五十釋文引王蜀注云衍廣也演者釋名云演延也言蔓延而廣也文選西征賦晉演義以獻說李善注引小爾雅演廣遠也七啓演聲色之妖靡李注引小爾雅曰演廣也

表從長也

表者說文云南北曰表廣雅云表長也從者史記周本紀正義云

長爲從淮南覽冥訓縱橫間之高誘注云南與北合爲縱一切經音義引韓詩傳云南北曰從是從與表義正同一切經音義卷二引小爾雅從長也又卷六卷二十四並引小爾雅表從長也

荷揭擔也

荷本作何易噬嗑何校滅耳釋文引王肅注云何擔國語齊語云負任擔何方言云賀擔也自關而西隴冀以往謂之賀凡以驢馬駝駝載物者謂之負佗亦謂之賀案何正字荷賀並假借字揭者說文云揭高舉也文選齊安陸昭王碑文注引司馬彪莊子注云揭擔也又說文云竭負舉也竭與揭義略同揭近本譌作揚今訂正一切經音義卷三引廣雅何揭擔也今廣雅無此語當卽小爾雅文又卷十四引小爾雅云拘揭擔也拘卽何之異文又卷十七引爾雅可揭擔也可卽何之省文又卷二十二卷二十四並引小爾雅何揭擔也

仍再也

仍者國語晉語晉仍無道韋昭注云仍重也廣雅釋言云重再也  
徇肄也

邶風谷風既貽我肄傳云肄勞也昭十六年左傳莫知我肄杜注  
亦云肄勞也案肄與勤通爾雅釋詁勤勞也釋文云勤或作肄徇  
者太元馴徇其勞范望注云勤躬徇國也徇近本誤作徇肄近本  
誤作歸今並訂正

工官也

工者周頌臣工嗟嗟臣工傳儀禮少牢饋食禮皇尸命工祝注並  
云工官也堯典允釐百工史記五帝紀作信飭百官

稽考也

堯典曰若稽古帝堯魏志高貴鄉公紀云賈馬及肅皆以爲順考  
古道

顛殞也

顛者易雜卦傳大過顛也釋文引虞注云顛殞也楚辭厥首用夫顛隕說文隕从高下也

躋陞也

躋者公羊文二年傳云躋者何升也方言云躋登也東齊海岱之間謂之躋古登升字通衛風蠨蛸朝躋于西傳云躋升周禮眡履鄭司農注云躋者升氣也廣韻躋與躋同

戕殘也

戕者公羊宣十八年傳戕鄫子於鄫者何殘賊而殺之也列子說符遂共盜而戕之殷敬順釋文云戕一本作殘

剽截也

剽說文作剽云剽絕也引夏書曰天用剽絕其命釋名云絕截也

辟除也

辟者文選上林賦注引韓詩章句云辟除也周禮喪祝及辟司農  
注云辟謂除敢塗禱也

恩惠也

恩者昭六年左傳主不恩賓杜注云恩惠也

謫責也

謫者方言云謫過也南楚以南凡相非議人謂之謫衛風北風室  
人交徧謫我傳云謫責也

間非也

舊注無  
間言

間者方言云間非也論語人不間於其父母昆弟之言陳羣注云  
人不得有非間之言也皇侃疏亦云間猶非

順退也

順者釋名云順循也漢書循循有退讓君子之風案順與遜通易  
坤履霜堅冰至蓋言順也春秋繁露作蓋言遜也爾雅釋言云遜

遯也易雜卦傳遯則退也

抗禦也

抗者儀禮既夕抗木注云抗禦也抗通作亢宣十年左傳而亢大國之討十五年傳結草以亢杜回注並云亢禦也文選七啓形不抗手李善注引小爾雅曰抗禦也一切經卷二十四引小爾雅禦抗也誤倒

靳取也

靳與靳通史記錯孫靳集解引徐廣曰靳一作靳案靳者求也僖十五年左傳予取予求與取義相成耳或曰取疑取字之譌莊十一年左傳服注取而惡之曰靳

蚩戲也

蚩者文選西京賦注引蒼頡云蚩侮也一切經音義引蒼頡云蚩笑也說文云蚩蚩戲笑貌文選文賦或受蚩於拙目注云蚩笑也



欽與蚩同一切經音義卷二十一卷二十二卷二十五並引小爾雅蚩戲也

褊狹也

褊者廣雅釋詁褊陋也陋與狹同楚辭初放云淺智褊能兮王逸

注云褊狹也

憖忌也

舊注趙襄子憖智伯

憖者說文心部云憖毒也周書云來就憖憖今書無此語言部憖忌也引周書曰上不憖于凶德今周書多方作爾尙不忌于凶德此蓋書本作替後人誤以訓詁字代經文耳案忌與毒義相近故憖亦可訓忌哀元年左傳少康憖澆二十七年傳趙襄子憖知伯皆其義也

沮疑也

沮者逸周書文酌解云聚疑沮事案沮與阻同廣雅釋言云阻疑

也閔二年左傳狂夫阻之注云阻疑也

虧損也

虧者說文云虧氣損也淮南精神訓無天下不虧其性高誘注云虧損也

毀壞也

判散也

判者周頌訪落繼猶判渙傳云判分也邛風匏有苦葉迨冰未泮傳云泮散也判與泮同

蔽斷也

蔽者昭十四年左傳叔魚蔽罪邢侯哀十八年傳惟能蔽志杜注並云蔽斷也周禮大宰以弊邦治小宰弊羣吏之治眡祲歲終則弊其事注並云弊斷也案蔽本與弊通襄二十七年左傳以誣道蔽諸侯釋文云蔽本作弊

交俱也

交者國語晉語苟交利而得寵國策秦策與秦交而舍韋昭高誘注並云交俱也

俘罰也

俘者文選注引國語賈注云伐國取人曰俘案伐本與罰通史記律書北至于罰罰者言萬物氣奪可伐也是伐與罰同故俘亦可訓罰淮南道應訓請浮君高誘注云浮罰也禮記投壺若是者浮注云晏子春秋曰酌者奉觴而進曰君令浮晏子時以罰梁邱據正義引小爾雅云浮罰也據此疑今本脫浮字

夷傷也

夷者易序卦傳云夷者傷也哀元年左傳無面傷周禮大祝注引作無面夷

枳害也

枳者尙書大傳云不赦有過謂之賊逆率過以小謂之枳山海經  
西山經浮山多盼木枳葉而無傷郭注枳刺箴也能傷人故名云  
說文痕歐傷也痕枳聲相同傷害義相近說文云害傷也

締閉也

締者說文云締結不解也呂覽君守篇魯鄙人遺宋元王閉高誘  
注云閉結不解也淮南人間訓夫兒說之巧於閉結無不解

靡細也

靡者方言云靡靡細好也又云東齊布帛之細者曰綾秦晉曰靡  
禮記月令靡草死疏云以其枝葉靡細故云靡草楚辭離騷精瓊  
靡以爲糗王逸注云靡屑也廣雅云糜糲也糲與屑同玉屑謂之  
糜米麥糲謂之糜皆取細碎之義又一切經音義引三蒼云糜微  
也列子湯問篇江浦之間有糜蟲張湛注云糜細也文選答賓戲  
注引通俗文云細小曰糜案糜與靡亦一聲之轉文選魯靈光殿

賦何宏麗之靡靡李善注引小爾雅曰靡細也

辨使也

辨者爾雅釋詁云俾使也俾辨聲之轉書序王俾榮伯作賄肅慎之命釋文云俾馬本作辨酒誥勿辨乃司某氏傳訓辨爲使用小爾雅文又案爾雅釋詁捭使也字又作倅洛誥云倅來馬注尙書平秩東作平作苹云苹使也周禮車僕掌苹車之倅注云故書苹作平平辨字本通堯典平章百姓後漢書劉愷傳注引作辨章是也

牧臨也

牧者方言云牧司也又云監牧察也是牧與監義略同說文云監臨下也周禮既稷司農注云監謂雲氣臨日也監謂之臨亦謂之察故牧謂之察亦謂之臨矣文選盧子諒贈劉琨詩來牧幽都李善注引小爾雅曰牧臨也

嘗試也

嘗者禮記檀弓盍嘗問焉注文嘗猶試也一切經音義卷六引小爾雅嘗試也

賴羸也

賴者說文云賴羸也徐鍇繫傳云晉灼注史記無賴曰江湖間謂小兒無利入於家曰無賴利卽羸也國語齊語相示以賴晉語已賴其地韋昭注並云賴羸也

若乃也

嗟發聲也

嗟者爾雅釋詁云嗟咨也文選注引舊注云嗟楚人發語端也釋名云嗟佐也言之不足以盡意故發此聲以自佐也文選西京賦嗟內顧之所觀李善注引小雅曰嗟發聲也案西都賦度宏規而大起李善注又云度或爲慶慶與羌古字通小爾雅曰羌發聲也

據此疑此條別有羌字與嗟同訓傳寫者脫之耳

奏爲也

奏者小雅六月以奏膚功傳云奏爲也

振救也

振者說文云振舉救也文選赭白馬賦振民隱修國章李善注引小爾雅曰振救也一切經音義卷四卷七卷十卷十一卷二十二並引小爾雅振救也

庸償也

庸疑當作庚禮記檀弓請庚之注云庚償也庚又作更周官馬質馬死則旬之內更鄭衆注云更猶償也又作賡管子國蓄篇愚者有不賡本之事尹知章注云賡猶償也賡與庸字相近而誤耳

買價也

買者說文云買市也一云坐賣售也周禮天官買人注云買主

市買知物價儀禮聘禮賈人西面坐啓櫝注云賈人在官知物價者

贍足也

贍者文選西征賦注引字書云贍足也古贍字多作澹文選謝靈運石壁精舍還湖中詩注引許慎淮南注云澹猶足也上林賦悉爲農郊以贍萌棘李善注引小爾雅曰贍足也

曹偶也

曹者楚辭招魂分曹並進王逸注云曹偶也史記扁鵲倉公列傳曹偶可人索隱云曹偶猶等輩也

麗兩也

麗者周禮校人麗馬一圉注云麗耦也詩干旄正義引王肅云古者一轅之車夏后氏駕兩馬謂之麗儀禮士昏禮儷皮注云儷兩也禮記曲禮離坐離立注云離兩也公羊桓二年傳離不言會注



云二國會曰離儷離並與麗同

驟數也

驟者說文云馬疾步也文十四年左傳公子商人驟施于國宣三年傳宣子驟諫服注並云驟數也

逞快也

逞者方言云逞快也自山而東或曰逞又云逞快也自關而東或曰逞一切經音義卷二十五引小爾雅逞快也

越遠也

越者說文云越度也襄十四年左傳越在他竟杜預注云越遠也方言云侑邈離也楚謂之越或謂之遠

姑且也

姑者周南卷耳我姑酌彼金罍傳云姑且也方言盥且也廣雅嫗且也皆與姑字假借通用

哿可也

哿者說文云哿可也小雅正月哿矣富人

釋解也

庸善也

庸者中庸正義引鄭目錄云中庸者以其記中和之爲用也庸用也案此雖訓庸爲用然中庸云喜怒哀樂之未發謂之中發而皆中節謂之和是和者中之用中庸猶言中和一切經音義卷二十三引廣雅云庸和高誘注呂覽貴公篇云善猶和也善與和義相近故庸亦訓善一切經音義卷二十三卷二十五並引小爾雅庸善也

荐重也

荐者爾雅釋言云荐再也又釋天云仍饑爲荐大雅雲漢饑饉薦臻傳云薦重也易坎水洊至釋文引劉注云洊仍也又震象傳洊

雷疏云游者重也薦游並與荐同

登升也

爾雅釋詁登陞也陞古字只作升

勵勉也

赫顯也

赫者大雅生民以赫厥靈傳云赫顯也

躔是也

躔者說文云躔是也洪範五者來備史記作五是來備後漢書荀爽傳云五躔咸備章懷注云躔是也

丕莊也

丕者說文云丕大也案莊與壯通衛太史柳莊漢書古今人表作柳壯方言云奘大也秦晉之間凡人之大謂之奘或謂之壯爾雅釋言云奘駟也郭璞注云今江東呼大爲駟猶麤也說文云奘駟

大也

佞才也

佞者成十三年左傳寡人不佞論語疏引服注云佞才也又皇侃論語疏云佞巧譎高材也材與才通

暨息也

舊注民之攸暨

暨者大雅嘉樂民之攸暨傳云暨息也疏引爾雅釋詁咽息也某氏曰詩云民之攸暨郭璞曰今東齊呼息爲咽則暨與咽古今字也惠定宇曰說文暨仰塗也非休息之謂又說文口部引詩云犬夷咽矣東夷謂息爲咽正義以暨與咽爲古今字未知何據玉篇云屍息也今爲慙屍與暨字相似假樂詩暨字當作屍或古字假借以暨爲屍案玉篇屍下並不引詩未可以詩暨字爲屍之假借此又訓暨爲息者儀禮士喪禮塗不暨於棺釋文云暨劉本作暨蓋咽既借作暨暨又通作暨耳

話善也

話者說文云話合會善言也大雅抑傳云話言古之善言也爾雅釋詁云話言也書疏引舍人注云話政之善言也又引孫炎注云話善人之言也文六年左傳著之話言十八年傳不知話言注並云話善也

愿謹也

愿者說文云愿謹也考工記弓人則莫能以愿中注云愿慤也說文云慤謹也

丰豐也

丰者說文云艸盛丰丰也從丰上下達也鄭風子之丰兮傳云丰豐滿也案豐說文但以爲象形字惟儀禮大射儀鄭注云豐字從豆曲聲但說文無曲字惟古文豐从豆从二丰疑此字不止象形直取丰盛之義亦并取丰聲也

都盛也

都者鄭風有女同車云洵美且都傳云都閑也鄭箋以閑爲習然閑亦有盛義廣雅釋訓云閑閑盛也故都亦爲盛又廣雅都與敦並訓大蓋一聲之轉孫炎注爾雅敦牂又訓爲盛故都亦可訓盛與文選上林賦妖冶爛都李善注引小爾雅曰都盛也史記司馬相如傳索隱引同

腆厚也

腆者說文云設膳腆腆多也方言云腆厚也

肆緩也

肆者淮南精神訓縱體肆意高誘注云肆緩也

競逐也

競者大雅桑柔執競用力箋云競逐也漢書五行志注引晉灼云

競走曰逐

紀基也

紀者秦風終南有紀有堂傳云紀基也國語晉語蔽兆之紀韋昭注云紀經也爾雅釋言云基經也

基教也

今本基下多忌字疑是爲基字作音傳寫誤爲正文

基者宣二年左傳楚人基之脫扃杜注云基教也文選西京賦人基之謀薛綜注同說文舛舉也从卅由聲春秋傳曰晉人或以廣隊楚人舛之黃顛說廣車陷楚人爲舉之案今左傳作基杜注訓教者蓋以基爲認之假借說文認誠也誠與教義略同

懋願也

懋者國語晉語敢歸諸下執政以懋御人又懋庇州犁焉又楚語吾懋置之於耳韋昭注並云懋願也說文懋一曰說也說即可願之義又說文甯所願也亦與懋聲近而義同小雅十月之交不懋遺一老釋文引爾雅懋願也今爾雅無之蓋卽小爾雅文近本懋

誤作整今訂正

愁強也

小雅十月之交不愁遺一老箋云愁者心不欲自彊之詞也釋文引爾雅愁強也蓋亦用小爾雅文案愁訓願又訓強者古訓多有相反者以徂爲存以亂爲治之類是也愁近本作愁案昭十二年公羊傳公子整釋文云整一讀爲愁左傳作愁哀十一年傳晉悼公子愁亡在衛釋文云愁一本作整是愁與整字相涉易亂故上文愁誤作整俗整字作愁故此又誤爲愁耳今訂正又案詩十月釋文引爾雅愁且也是小爾雅於愁字本有二訓今本脫此條耳說文愁下一曰甘也玉篇甘作且爲是

薄迫也

薄者釋名云薄迫也單薄相逼迫也文選海賦西薄青徐李善注引小爾雅曰薄迫也一切經音義卷二十卷二十三並引小爾雅



薄迫也

燁炊也

舊注左氏燁之以薪

燁者說文云燁炊也逸周書周祀解火之燁也孔晁注云燁然也然火所以炊也

資取也

質信也

質者說文云質以物相贅是所以爲信也襄九年左傳要盟無質服注云質誠也

餽饋也

案餽說文作氣云饋客芻米也桓六年左傳齊人饋之餽哀十二年傳地主歸餽歸與饋古字通

憑依也

憑本作凭書顧命憑玉几說文几部引作凭云凭依几也文選西

京賦察雲師之所憑登樓賦憑軒檻以遙望寡婦賦猶依依以憑附陸士衡苦寒行猛虎憑林嘯李善注並引小爾雅曰憑依也

藉借也

藉者周禮甸師掌帥其屬而耕耨王藉注云藉之言借也風俗通祀典云古者使民如借故曰藉田宣十二年左傳敢藉君靈注云藉猶假借也

際接也

際者爾雅釋詁云際捷也郭璞注云捷謂相接續也古捷接字通際又通作瘳易豐天際翔也釋文引鄭注際當爲瘳小雅菀柳無自瘳焉箋云瘳接也

闕限也

闕者說文云闕外閉也後漢虞詡傳注云闕與礙同一切經音義云闕郭璞以爲古文礙字法言問道篇礙諸以禮樂李軌注云礙

限文選西京賦隔闕華戎文賦恢萬里而無闕李善注引小爾雅  
曰闕限一切經音義卷六引小爾雅闕限也

廬寄也

廬者說文云廬寄也秋冬去春夏居釋名云寄止曰廬一切經音  
義卷九引小爾雅廬寄也

萃集也

萃者易雜卦傳萃聚也聚與集同方言云萃集也

蓬倅也

蓬者昭十一年左傳僖子使助蓬氏之蓬杜注云蓬副倅也釋文  
引說文蓬从艸作蓬列女傳云趙簡子將渡河用楫者少一人津  
女媚攘袂卷楫而請曰妾願備持楫簡子蓬之是也又淮南子汜  
論訓云今夫儻載者爲轅軸之折也又加轅軸其上以爲造造與  
蓬通

尤怪也

尤者昭二十一年左傳張勾尤之杜注尤怪也

費慚也

費者國語晉語臣得其志而使君費韋昭注云費慚也襄十四年左傳亦無費焉注云費悶也文選魏都賦有覲費容劉淵林注云費愧也

索空也

索者昭十二年左傳疏引張平子說云八索周禮八議之刑索空空設之案索通作素釋名釋典藝云八索索素也昭十二年左傳釋文云索本作素魏風伐檀不素餐兮傳云素空也

素故也

素者儀禮喪服傳飯素食注云素猶故也謂復平生時食也一切經音義卷二十四引小爾雅固亦故也案亦字衍今本此條脫固

字

視比也

視者孟子受地視侯趙岐注云視比也

徨往也

案徨本作皇國策魏策以臨彷徨淮南子作方皇小雅楚茨先祖是皇箋云皇睨也信南山先祖是皇箋云皇之言往也魯頌泮水烝烝皇皇箋云皇皇當作睨睨案睨睨猶往往也

矜惜也

狃怵也

狃者說文云狃犬性驕也徐鍇繫傳本作犬性怵也案說文無怵字當作慄心部云慄習也張揖雜字怵音曳是也桓十三年左傳莫敖狃于蒲騷之役杜注狃怵也國語晉語得國而狃韋昭注云狃怵慣習也爾雅釋言狃復也疏引孫炎注云狃怵前事復爲也

文選西京賦心侈體忮李善注引小爾雅曰狃忮也西征賦忮淫  
嬖之匈忍注又引小爾雅曰忮忮也案忮與狃同忮與忮同

覲望也

覲者文選登樓賦注引國語賈注云覲望也案覲與冀同國語魯  
語吾冀爾朝夕修我韋昭注云冀望也禮記文王世子注大夫勤  
於朝州里體於邑韓勅碑莫不體思歎印體亦與覲同一切經音  
義卷二十五引小爾雅覲望也

何任也

何者商頌烈祖百祿是何傳云何任也爾雅釋天何鼓謂之牽牛  
釋文引小爾雅云何任也一切經卷二十四引小爾雅何任也

御侍也

御者周禮春官御史儀禮大射儀士御於大夫注並云御猶侍也

殿填也

殿者小雅采菽殿天子之邦傳云殿鎮也釋文殿填也東山箋云古聲寘填塵同漢書五行志填星卽鎮星也蕭何傳填撫諭告杜欽傳填撫四夷皆以填爲鎮周語是陽失其所而鎮陰也史記周本紀作填是也案填近刻譌作慎今訂正

選擇也

宣示也

小爾雅義證卷二

小爾雅義證卷二

涇 胡承珙

廣訓

諸之乎也

說文云乎語之餘也諸者邛柏舟日居月諸正義云居諸者語助也故日月傳曰日乎月乎不言居諸也又引左傳畢陶庭堅不祀忽諸服虔云諸辭廣雅釋詁云乎詞也之者廣雅釋言云之諸也魏風伐檀寘之河之側兮漢書地理志作寘諸河之側兮孟子封之有庠後漢書袁紹傳注作封諸有鼻是之與諸字本通故同爲乎也

旃焉也

顏氏家訓音辭篇引字書云焉者鳥各或云語辭葛洪字苑曰焉字訓何訓安音於愆反於焉逍遙於焉嘉客焉用佞焉得仁之類



是也若送句及語詞音矣愆反故稱龍焉故稱血焉有民人焉有社稷焉託始焉爾晉鄭焉依之類是也據此焉雖同爲語辭音義微別旃者秦風采芴舍旃舍旃箋云旃之言焉也魏風尙慎旃哉傳云旃之也準此則旃之爲焉是送句及語詞之類也

惡乎於何也

禮記檀弓吾惡乎用吾情桓六年公羊傳惡乎淫注並云惡乎猶於何也大戴禮武王踐阼惡有藏之約盧注定九年穀梁傳惡得之范注並云惡於何也是單言惡亦爲於何也

烏乎吁嗟也吁嗟嗚呼也有所歎美有所傷痛隨事有義也

說文云烏孝鳥也象形孔子曰烏聃呼也取其助氣故以爲烏呼釋名云嗚舒也氣憤懣故發此聲以舒寫之也文選注引韓詩章句云吁嗟歎辭也此反覆申明其義互相轉注烏乎字又作嗚呼者程大昌考古質疑曰嗚呼均之歎聲也書作嗚呼詩作於乎記

作於戲漢書王貢傳以爲惡虐五行志以爲烏嘽是也顏師古匡  
謬正俗曰或嘉其美或傷其悲其詞備在詩書不可具載大雅云  
於乎小子未知臧否豈非傷王不知善否乎周頌云於乎前王不  
忘非美先王之見稱頌乎五子之歌云嗚呼曷歸予懷之悲此卽  
哀傷之語允征云嗚呼威克厥愛允濟此卽褒美之辭準此言之  
周南云于嗟麟兮非美公子之信厚乎衛風云于嗟鳩兮非傷婦  
人之見誘乎召南云于嗟乎騶虞亦卽歎美之辭秦風云于嗟乎  
不承權輿亦卽傷痛之語也後漢書岑彭傳注云於戲歎美之辭  
見爾雅蓋卽指小爾雅也

無念念也

大雅文王無念爾祖傳云無念念也正義云無念是反而言之故  
云念也爾雅釋訓云勿念勿忘也孝經釋文引鄭注云無念無忘  
也

無寧寧也

說文云寧願詞也隱十一年左傳無寧茲許公復奉其社稷襄二十九年傳無寧夫人而焉用老臣昭六年傳無寧以善人爲則服杜注並云無寧寧也

不顯顯也不承承也

周頌清廟不顯不承傳云顯於天矣見承於人矣箋云是不光明文王之德與言其光明之也是不承順文王之志意與言其承順之也是不顯不承傳與箋皆言顯也承也

不肖不似也

說文云肖骨肉相似也不似其先故曰不肖也禮記雜記某之子不肖注云肖似也不肖言不如人賈子修政語云行者惡則謂之不肖矣論衡自然篇云不肖者不似也一切經音義卷一卷十一卷二十五並引小爾雅不肖不似也

繩之譽之也

莊十四年左傳繩息媯以語楚子注云繩譽也呂氏春秋四月紀周公旦作詩以繩文王之德禮記表記君子不以口譽人注云譽繩也案左傳釋文云繩說文作繩今說文闕此字陸德明所見本有之孔疏亦云字書繩作繩字訓爲譽然則經傳作繩者乃繩之假借廣雅釋詁云繩譽也

詰朝明旦也

成二年左傳詰朝請見注云詰朝平旦十六年傳詰朝爾射死莒注云詰朝猶明朝襄十四年傳詰朝之事注云詰朝明旦趙宦光說文長箋云詰朝當本作詰朝詰古哲字借明也故明朝爲詰朝今俗以詰爲詰因詰詰形溷而誤

遐不黃耇言壽考也

小雅南山有臺云樂只君子遐不黃耇傳云黃黃髮也耇老也儀

禮士冠禮黃耆無疆注云黃黃髮也耆凍梨也皆壽徵也爾雅釋  
詁云黃髮齟齒給背耆老壽也詩疏引舍人云黃髮老人髮白復  
黃也左傳疏引舍人云耆觀也血氣精華觀竭言色赤黑如狗矣  
詩疏引舍人云耆面如凍梨色如浮垢老人壽徵也釋名云九十  
曰給背或曰黃耆鬢髮變黃也耆垢也皮色驪頓恆如有垢者也  
或曰凍梨皮有斑黑如凍梨色也論衡無形篇云人少則髮黑老  
則髮白白久則黃人少則膚白老則膚黑黑久則黯若有垢矣髮  
黃而膚有垢故禮曰黃耆無疆以上諸家釋黃髮之義略同惟於  
耆字或專釋其義或兼取其聲大旨亦不甚殊耳

公孫碩膚德音不瑕道成王大美聲稱遠也

豳風狼跋云公孫碩膚德音不瑕傳云公孫成王也豳公之孫也  
碩大膚美也疏云傳以雅稱曾孫皆是成王以其是豳公之孫也  
碩大釋詁文膚美小雅廣訓文言周公欲待公孫成王長大有大

美之德鄭箋以公爲周公讀孫如公孫于齊之孫言周公既致太  
平乃孫遁辟此成功之大美今案序云狼跋美周公也周公攝政  
遠則四國流言近則王不知周大夫美其不失其聖也然則此詩  
專指周公攝政羣叔流言時事無一語及於致太平之後且既致  
太平矣卽復政被留亦何致於失其聖疏引孫毓云詩書各例未  
有稱天子爲公孫成王之去豳公又已遠矣又此篇美周公不美  
成王故以箋義爲長然古人質樸不嫌稱天子爲公孫商頌烈祖  
祀中宗而稱湯孫魯頌闕宮稱僖公爲周公之孫其去湯與周公  
亦遠矣周公輔成王者美成王卽所以美周公也此詩傳說得之  
小爾雅所釋正與毛合無嫌與鄭異義惟此傳訓瑕爲過而邶風  
泉水不瑕有害傳云瑕遠也二子乘舟不瑕有害傳言二子之不  
遠害疑狼跋傳亦當訓瑕爲遠鄭箋云言不可疵瑕乃與毛異義  
今本毛傳瑕過也過蓋遠之誤耳此釋德音不瑕爲聲稱遠者亦

與毛傳合也不瑕言瑕與上文不顯顯也不承承也一例

鄂不韡韡言韡韡也

小雅常棣云常棣之華鄂不韡韡傳云常棣棣也鄂猶鄂鄂然外發也韡韡光明也釋文云不毛如字疏引王肅述毛詩不韡韡言韡韡也箋謂承華者曰鄂不當作拊拊為鄂足與毛異義然毛無破字之例此之所訓自與毛傳合也

我從事獨賢勞事獨多也

古人賢者不兼將天子為公於此則

小雅北山云大夫不均我從事獨賢傳云賢勞也箋云王不均大夫之使而專以我有賢才之故獨使我從事於役自苦之辭疏引王肅難鄭云王以己有賢才之故而自苦自怨非大臣之節斯不然矣案毛釋北山與孟子合但孟子我獨賢勞也賢勞二字連文非以勞訓賢可知趙岐注訓賢為賢才與鄭義同毛釋賢為勞則孟子言賢勞者猶云勤勞也小爾雅訓賢為多云此莫非王事我

獨多勞也廣詁云賢多也故此以獨賢爲獨多蓋從事之中得兼勞意雖微與毛異大旨亦同耳

魴鱣甫甫語其大也

大雅韓奕云魴鱣甫甫傳云甫甫然大也案齊風敝笱云其魚魴鱣疏引陸璣云今伊洛濟潁魴魚也廣而薄肥恬而少力細鱗魚之美者也爾雅釋魚魴𩺰郭注云今江東呼魴魚爲𩺰一名𩺰鱣說文作𩺰山海經海內北經大𩺰居海中郭注𩺰卽魴也詩疏又引陸璣云𩺰似魴厚而頭大魚之不美者其頭尤大而肥者徐州人謂之𩺰或謂之鱣幽州人謂之鴉鷁或謂之胡鱣夫魴一名𩺰鱣一名鱣庸不皆取大名故敝笱傳總言魴鱣大魚爾雅釋詁云甫大也此甫甫重言之亦爲大也易林離之中孚魴鱣詡詡廣雅詡詡大也詡詡與甫甫同

麀鹿麀麀語其衆也



小雅吉日麀鹿麀麀傳云鹿牝曰麀麀麀衆多也箋云麀牝曰麀  
牝曰麀麀復麀言多也案麀當從說文作𧇗云麀鹿羣口相聚也  
引詩曰麀鹿𧇗𧇗大雅韓奕正作𧇗𧇗傳云𧇗𧇗然衆也吉日乃  
誤以𧇗爲麀箋遂以麀牝之麀當之案詩方言麀鹿不應復重文  
言麀麀且言多亦不應專指麀故當從說文爲確爾雅釋獸云鹿  
牝麀今麀鹿無角毛雜黃白色而無斑鹿性多羣聚說文云鹿之  
性見食急則必旅行夏小正云八月鹿人從鹿人從者從羣也羣  
聚是衆之義故於麀鹿言衆矣

海物維錯雜也

書禹貢海物維錯史記夏本紀集解引鄭注尙書云海物海魚也  
魚種類尤雜按書大傳云夏成五服外薄四海東海魚須魚目南  
海魚革珠璣大貝西海魚骨魚幹魚膾北海魚劍魚石出瑱擊閭  
此正與鄭義合海物自以魚屬爲多也錯者召南漢廣翹翹錯薪

傳云錯雜也

雜毛曰氅

爾雅釋言云氅，屬也。郭注云：毛氅，所以爲屬。周禮司服：毳冕，司農注云：毳，屬衣也。鄭注尚書云：毳，亂毛也。是屬與毳同。亂毛者，雜毛。漢書王莽傳：莽好以氅裝衣。注云：毛之強曲者曰氅。以裝褚衣中，令其張起也。說文作縠，云強曲毛可以著起衣。著與褚同。強曲毛者亦雜毛也。

雜彩曰繪

說文云：繪，五采繡也。文選注引小爾雅作綵。吳都賦：孔雀綵羽，以翱翔射雉。賦：丹臆蘭綵。李善注並引小爾雅曰：雜彩曰綵。又通作粹。江賦：瑤珠怪石，粹其表。注云：粹與綵同。小爾雅曰：雜彩曰綵。方言云：綵同也。宋衛之間曰：綵，說文作粹。云會五采繒色也。

雜言曰詭

說文云隗隗異之言亦曰雜語管子小匡云雜處則其言隗文選  
長笛賦隗聒其前後者注云隗聒雜聲也閔二年左傳衣之龙服  
注云龙雜色說文隗白黑雜毛牛是凡言龙皆雜異之義也

小爾雅義證卷三

小爾雅義證卷四

涇 胡承珙

廣義

凡無妻無夫通謂之寡寡夫曰癸寡婦曰嫠

詩桃夭序疏云孝經注丈夫六十無妻曰鰥婦人五十無夫曰寡  
白虎通云鰥之言鰥鰥無所親則寡者少也言少匹對耳故鴻雁  
傳偏喪曰寡此其對例也婦人無稱鰥之文其男子亦稱寡襄二  
十八年傳曰崔杼生成及疆而寡故爾雅曰無夫無婦並謂之寡  
丈夫曰索婦人曰嫠案今爾雅無此文所引卽小爾雅也但字微  
異耳墨子辭過篇曰內無拘女外無寡夫又云天下之男多寡無  
妻女多拘無夫亦男子稱寡之證也癸者字與嫠惇同周頌閔子  
小子嬛嬛在疚漢書匡衡傳引作癸癸在疚小雅正月哀此惇獨  
楚辭注引作哀此癸獨集韻云癸或作僂方言僂特也楚曰僂嫠

者襄二十五年左傳嫠也何害注云寡婦曰嫠又通作釐毛詩巷伯傳鄰之釐婦音義云釐婦寡婦也

妾婦之賤者謂之屬婦屬逮也逮婦之名言其微也

周書梓材至于屬婦東晉孔傳以屬婦爲存恤妾婦不以二字連文惟陸氏釋文云屬婦妾之事妻也疏謂屬婦以妾屬于人者故名屬婦二文皆與小爾雅義合釋名云屬續也恩相連續也妾接也以賤見接幸也說文屬連也从尾蜀聲又云尾微也屬既从尾亦得兼微義文選東京賦薛綜注云屬逮也周南樛木序云后妃能逮下也禮記中庸所以逮賤也是言逮者皆及於微賤之義也非分而得謂之幸

荀子王制篇朝無幸位民無幸生楊倞注云幸僥幸也王充論衡幸偶篇云孔子曰君子有不幸而無有幸小人有幸而無不幸文選李少卿答蘇武書李注引小爾雅曰非分而得謂之幸一切經

音義卷三卷六並引小爾雅非分而得謂之幸

詰責以辭謂之讓

廣雅釋詁云詰讓也說文云責求也又云讓相責讓也周禮司救凡民之有表惡者三讓而罰疏云凡欲治罰人者皆先以言語責讓之

男女不以禮交謂之淫

桓十八年左傳申繻曰女有家男有室無相瀆也謂之有禮禮記坊記夫禮坊民所淫著民之別使民無嫌以爲民紀者也故男女無媒不交無幣不相見一切經音義卷二引小爾雅男女不以禮交曰媵媵正字淫借字

上淫曰烝

桓十六年左傳烝於夷姜疏云烝訓爲進言自進與之淫也詩疏引服虔云上淫曰烝方言云上媵爲烝又云烝媵也廣雅釋詁亦

云蒸姪文選劉孝標辨命論注引小爾雅曰上淫曰蒸蒸與烝同  
下淫曰報

宣三年左傳文公報鄭子之妃詩疏引服虔云報復也淫親屬之  
妻曰報漢律淫季父之妻曰報杜注本服虔惟引漢律一語案漢  
律當因左傳此文而設據服虔云鄭子是文公叔父子儀故以報  
名屬之淫季父之妻其實君淫臣妻正所謂下淫或謂報同褒褒  
亦進也淫季父之妻曰報乃上淫之通稱與烝同義非也廣雅釋  
詁云報姪也文選劉孝標辨命論注引小爾雅曰下淫曰報

旁淫曰通

桓十八年左傳文姜如齊齊侯通焉詩疏引服虔云旁淫曰通言  
旁者非其妻妾旁與之淫上下通名也牆有茨云公子頑通于君  
母左傳曰孔懼之母與其豎渾良夫通皆上通也齊莊公通于崔  
杼之妻蔡景侯爲太子般娶于楚通焉皆下通也以此知通者總

名故服虔又曰凡淫曰通也國語晉語通于驪姬韋昭注亦云旁淫曰通廣雅釋詁云通淫也

不直失節謂之慙慙愧也

廣雅釋詁云直正也是不直猶不正也成十五年左右傳下失節注云愚者妄動國語周語云姦禮爲羞姦禮猶失節也是不直失節皆可羞之事故謂之慙說文云慙媿也一切經音義卷十九引小爾雅不直失節謂之慙慙愧也爾雅釋言釋文引小爾雅不直失節謂之慙慙愧也邢疏同周禮小司寇賈疏引小爾雅不直失節謂之慙愧蓋全引此二句脫兩字耳

面慙曰慙

慙本作赧因聲近而誤說文云赧面慙赤色方言云赧愧也秦晉之間凡愧而見上謂之赧郭璞注引小爾雅面赤愧曰赧案赤字疑衍一切經音義卷二引小爾雅面愧曰赧小司寇賈疏史記周



本紀索隱文選季重答東阿王書李注一切經音義卷二十二並引作面慙曰赧惟爾雅釋言釋文引小爾雅作面慙曰慙與今刻同蓋難赧聲相近故字可通與

心慙曰慙

說文云慙慙也方言云俛慙慙也荆揚青徐之間曰俛若梁益秦晉之間言心內慙矣山之東西自愧曰慙郭璞注引小爾雅曰心愧爲慙文選思元賦莫吾知而不慙李善注引小爾雅曰心愧爲慙封禪文以登介邱不亦慙乎注又引小爾雅曰心慙曰慙一切經音義卷十九引小爾雅心慙曰慙小司寇賈疏爾雅釋言釋文並引小爾雅心慙曰慙邢疏同

體慙曰逡

爾雅釋言云逡退也注云逡巡却去也文選上林賦注引廣雅云逡巡却退也案體慙無所形見逡巡却退卽是慙懼之意班固東

都賦云西都賓矍然失容逡巡降階慄然意下捧手欲辭卽是言體慙之貌也爾雅釋言釋文引小爾雅體慙曰逡邢疏同小司寇買疏引作體慙曰悛

小爾雅義證卷四



小爾雅義證卷五

涇 胡承珙

廣名

諱死謂之大行

漢書霍光傳注引韋昭曰大行不返之辭也通典注引魏孫毓曰禮記告喪曰登遐告訃之辭也或曰大行之稱起于漢氏漢書曰大行無遺詔大行在前殿諡法大行受大名小行受小名言其有大德行必受大名若稱諡也後漢書安帝紀注云禮有大行人小行人主諡號官也韋昭曰大行者不返之辭也天子崩未有諡故稱大行也穀梁傳曰大行受大名風俗通曰天子新崩未有諡故且稱大行皇帝義兩通吳曾能改齋漫錄云古來人君未有諡號皆以大行稱之往而不返之義也周密齊東野語云大行韋注平聲理宗之喪湖州教官劉億讀祝依文選注作去聲所謂大行受

大名細行受小名此雖諡法而實不然也案大行之稱當以章昭所釋爲正此云諱死者蓋不敢斥其死故諱之稱爲大行猶陟方登假之類李賢注後漢書及通典注所引或說雖本周書諡法解及穀梁傳爲說實於本義無當也又案史記李斯傳胡亥曰今大行未發是秦時已稱大行通典注謂起於漢氏非也

死而復生謂之蘇

易震蘇蘇虞注云死而復生稱蘇一切經音義引聲類云更生曰蘇宣八年左傳晉人獲秦諜殺諸絳市六日而蘇一切經音義卷二十二引小爾雅更生曰蘇此蓋誤引聲類卷二十五引小爾雅死而復生謂之蘇

疾甚謂之阽

舊注言危也

說文云阽壁危也通借爲阽危字玉篇云阽危也顧命疾大漸惟幾幾者危也疾甚欲死如臨危欲墮故謂之阽也

請天子命曰未可以戚先王請諸侯命曰未可以近先君請大夫命曰未可以從先子

書疏引鄭志答趙商問曰君父疾病方困忠臣孝子不忍默爾視其歔歔歸其命于天中心惻然欲爲之請命周公達於此禮著在尙書若君父之病不爲請命豈忠孝之志也據此則請命之禮其來古矣金縢周公曰未可以戚我先王東晉孔傳卽用小爾雅爲訓云戚近也周公言未可以死近我先王疏謂武王既定天下當成就周道未可以死近我先王案廣詁云戚近也故此未可以戚先王與下未可以近先君等文義一也

空棺謂之櫬有口謂之柩

禮記雜記其轉有祓注云轉讀爲櫬櫬棺也襄四年左傳無櫬注云櫬親身棺也櫬字从木从親故爲親身之義僖六年傳士輿櫬昭四年傳士祖輿櫬襄二年傳穆姜使擇美櫬以自爲櫬此數者

或因待罪或由豫備皆設而未用已有襯名故空棺謂之襯也禮記曲禮在牀曰尸在棺曰柩注云柩之言究也釋名云尸已在棺曰柩柩究也送終隨身之制皆究備也白虎通云柩之爲言究也久也不復變也一切經音義卷十二卷十七並引小爾雅有尸謂之柩空棺謂之襯二語前後與今本異

饋死者謂之贈衣服謂之襚

春秋隱元年天王使宰咺來歸惠公仲子之贈疏引服虔云贈覆也天王所以覆被臣子何休亦云贈猶覆也蓋謂覆被亡者耳公羊隱元年傳云贈者何喪事有贈贈者蓋以馬以乘馬束帛車馬曰贈貨財曰賻衣服曰襚注云贈猶覆也賻猶助也皆助生送死之禮襚猶遺也遺是助死之禮知生者贈賻知死者贈襚穀梁隱元年傳云贈者何也乘馬曰賻衣衾曰襚貝玉曰含錢財曰賻荀子大略篇說苑修文篇白虎通崩薨篇所陳皆略同案儀禮既夕

禮云公贈元纁束馬兩注云贈所以助主人送葬也荀子說苑並云賻贈所以佐生此惟言饋死者據禮記少儀云贈馬入廟門賻馬與其幣大白兵車不入廟門注云贈馬入廟門以其主於死者賻馬以下不入廟門以其主於生人也疏謂以馬送死曰贈賻副亡者之意也是贈仍以饋死爲主贈之訓覆自是覆被亡者之身故穀梁隱三年傳亦云饋死者曰贈公羊疏云賻專施於生襚專施於死賻實生死兩施而旣夕禮專言知生者對贈言之故也說文云襚衣死人也士喪禮君使人襚注云襚之言遺也少儀敵者曰襚疏謂禮以衣送敵者死曰襚襚者遂彼生時之意也衛風碩人說于農郊箋云說當作襚禮春秋之襚讀皆宜同衣服曰襚今俗語然疏云禮與春秋之襚謂之衣服曰襚贈死者故何休云襚猶遺也以衣服可以遺人因謂衣服爲襚雖遺吉之衣服亦謂爲襚據此以衣服爲襚漢時俗語猶然不必定指衣死人以其送死



之衣亦有襚名後遂專屬之凶事故穀梁疏云襚者衣服之名故送死之衣亦謂之襚也陳祥道云襚雖以衣服而有車馬雜記所謂以後路與冕服襚也陸佃云衣服曰襚而以路非正也

### 埋柩謂之煉

說文云煉瘞也禮經通作煇儀禮士喪禮掘煇見衽注云煇埋棺之坎也掘之於西階上疏云煇訓爲陳謂陳尸于坎鄭卽以煇爲埋棺之坎也釋名云假葬于道側曰煇煇翳也此雖與儀禮西階上之煇異其於埋柩之義則一也

### 煉坎謂之池

案煉坎謂池不見經傳惟檀弓曾子弔於負夏主人旣祖填池推柩而反之此池當卽謂煉坎蓋殯而掘煇爲池將葬遷柩則填池矣推柩而反之者謂雖填池而仍反柩於殯也鄭注以填池當爲奠徹聲之誤奠徹謂徹遣奠設祖奠反於載處榮曾子弔欲更始

釋文云填池盧王並如字讀據此知盧王讀池者卽是隸坎之名蓋隸坎謂池古有斯義鄭說似稍迂曲不如依雅訓爲正也

壙謂之窆

說文云窆穿地也周禮小宗伯甫窆亦如之注云鄭大夫讀窆皆爲穿杜子春讀窆爲毳皆謂葬穿壙也今南陽各穿地爲窆壙者周禮方相氏入壙注云壙穿地中也喪祝及壙說載除飾注云壙謂穿中也

下棺謂之窆

說文窆葬下棺也周禮鄉師及窆執斧以涖匠師司農注云窆謂葬下棺也春秋傳曰日中而塋禮記所謂封者疏云塋封及此經窆字雖異皆是下棺之事說文又云塋喪葬下土也春秋傳曰朝而塋禮謂之封周官謂之窆

填窆謂之封

易繫辭傳不封不樹虞注云穿土稱封禮記檀弓於是封之崇四尺注云聚土曰封墳窆者以土填其穿中禮記王制注云封謂聚土爲墳是也

宰冢也

說文云冢高墳也宰者公羊僖二十三年傳宰上之木拱矣何休注云宰冢也荀子大略篇望其墳臯如也楊倞注云臯當爲宰宰冢也宰如高貌列子天瑞篇宰如也殷敬順釋文云宰如言如冢也哀三年左傳命宰人出禮書注云宰人冢人之屬方言冢或謂塚廣雅塚冢也塚宰聲相近

壘塋也

說文云塋墓地也廣雅釋邱云塋葬地也又云壘冢也方言云冢秦晉之間謂之墳或謂之壘

無主之鬼謂之殤

說文云殤不成人也人年十九至十六死爲長殤十五至十二死爲中殤十一至八歲死爲下殤儀禮喪服傳同釋名則統言之云未二十而死曰殤殤傷也可哀傷也無主之鬼者無主猶無後也禮記云宗子爲殤而死庶子弗爲後也殤無爲人父之道故絕無後爲之祭主是爲無主之鬼又周禮大祝注引司農注云如今祭殤無所主命疏謂凡祭祀天子諸侯木主大夫士有幣帛主其神據此以主命爲神主之主蓋祭殤禮略無所主命亦得爲無主之義也

小爾雅義證卷五



小爾雅義證卷六

涇 胡承珙

廣服

治絲曰織織繒也

說文云織作布帛之總名此惟言治絲曰織者織作之功於絲爲多也禮記玉藻士不衣織注云織染絲織之士衣染繒也疏云織者前染絲後織之此服功多色重故士賤不得衣之也大夫以上衣織染絲織衣也士衣染繒據此以織與繒爲二今謂織爲繒者禹貢厥篚織貝東晉孔傳云織細紵史記夏本紀集解引傳云織細繒也案今書傳作細紵者傳寫之誤正義亦襲其誤耳鹽鐵論刺議篇云文繒薄織不鬻於市是織與繒同物也

麻苧葛曰布布通名也

春秋說題辭云麻之爲言微也陰精浸密女作織微也禮記雜記

有司麻衣注云麻衣白布深衣論語集解引孔注云麻冕緇布冠也苧通作紵詩疏引陸璣云紵亦麻也科生數十莖宿根在地中至春自生不歲種也荆揚之間一歲三收今南越紵布皆用也禾說文丑紵縠屬細者爲紵祖者爲紵顏師古急就篇注紵織縠爲布及疏也文選吳都賦果布輻湊而常然劉淵林注云布箋紵之屬葛者儀禮士虞禮冪用絺布注云絺布葛屬禹貢疏云葛越南方布名是麻苧葛皆曰布布爲通名也

續綿也絮之細者曰續

宣三年左傳三軍之士皆如挾續注云續綿也玉篇亦云續綿也釋名云縣猶涸涸柔而無文也說文云絮敝縣也廣韻精曰縣粗曰絮說文又云續絮也儀禮既夕屬續以俟絕氣注云續新絮玉藻續爲繭緼爲袍注云衣有著之名也續謂今之新縣也緼謂今續及舊絮也正義鄭注之時以好者爲綿惡者爲絮案此云續綿

也絮之細者曰纒亦是以前者爲絲爲纒也一切經音義卷五卷六並引小爾雅纒絲也絮之細者曰纒莊子泝泆釋文引小爾雅云絮細者謂之統統與纒同

縵之精者曰縵

文選雪賦注引字林云縵帛總名也淮南兵略訓雖有縵之幘高誘注云縵細縵也後漢書順帝紀注引小爾雅縵皓也縵之精白者曰縵案此乃合廣詁文并引之顏師古漢書食貨志注云縵皓素也縵之精白者也此雖不著所出亦必用小爾雅也文選曹子建雜詩綺縵何繽紛李善注引小爾雅曰縵之精者曰縵陳孔璋爲曹洪與魏文書奔兗之觸魯縵注又引爾雅曰縵之細者曰縵縵之麤者曰素

廣雅釋器云縵練也周禮染人注暴練練其素而暴之禮記玉藻大夫以上素帶又云弟子縵帶縵細於素大夫以上帶用素弟子



反用縞者考童子錦紳錦至文細童子紳得用錦猶弟子帶得用縞蓋弟子未能遠別不與大夫較精粗也又玉藻縞冠素紕正義云當祥祭之時縞冠以其漸吉若既祥之後微申孝子哀情故加以素紕以素重於縞案凡喪服以粗者爲重細者爲輕孔正義謂素重於縞爲申哀情可以證小爾雅縞之麤者爲素矣

葛之精者曰絺麤者曰綌

說文云葛絺綌草也周南葛之覃兮傳云葛所以爲絺綌又曰精曰絺麤曰綌疏引曲禮云爲天子削瓜巾以絺諸侯巾以綌玉藻云浴用二巾上絺下綌皆貴絺而賤綌是絺精而綌麤故曰精曰絺麤曰綌說文云絺細葛也綌麤葛論語皇侃疏云絺細葛練也綌大葛練也

在首謂之元服

爾雅釋詁云元首也儀禮士冠禮始加元服注云元首也大戴禮

記載孝昭冠辭曰始加昭明之元服後漢書順帝紀注云元服冠也安帝紀注云元服謂之冠也

弁髦太古冠布冠而敝之者也

昭九年左傳豈如弁髦而因以敝之注云童子垂髦始冠必三加冠成禮而棄其始冠故言弁髦因以敝之疏云弁謂緇布冠髦謂童子垂髦凡加冠之禮先用緇布之冠斂括垂髦三加之後去緇布之冠不復更用故云因以敝之冠義云始冠緇布之冠冠而敝之可也玉藻亦云始冠緇布冠自諸侯下達冠而敝之可也鄭元云本太古耳非時王之法服也是言本古而暫冠既加而卽棄故云弁髦而因以敝之弁有爵弁皮弁嫌緇布之冠不得名弁故云弁亦冠也劉炫以爲弁髦二物以童子垂髦爲髡彼兩髦又云因以敝之者謂親沒不髦按禮加冠以後親沒以前身既成人猶自垂髦何得云童子垂髦髦既親沒乃棄杜注何以不言親沒也若

三加之後棄弁不棄髦杜注何得云棄其始冠故言弁髦因以做之既連髦而言明非親沒之髦也案儀禮士冠記始冠緇布之冠也太古冠布齋則緇之其緜也孔子曰吾未之聞也冠而做之可也鄭注郊特牲云雜記曰大白緇布之冠不緜大白卽太古白布冠今喪冠也齊則緇之者鬼神尙幽闇也唐虞以上曰太古也此重古而冠之耳三代改制齊冠不復用也以白布冠質以爲喪冠也據此緇布冠自士以上既冠不復著故曰冠而做之左傳所謂弁髦弁卽謂緇布冠冠弁散文通稱以緇布之冠歛括垂髦故連髦言之杜注與小爾雅義合劉光伯之說非也

題頭也

舊本作題頰也

題者漢書揚雄傳璇題玉英應劭注題頭也王制南方曰蠻雕題交趾北山經云狀如豹而文題白身頭謂之題故棟頭謂之棖題箭頭謂之箭題其義一也舊本作題頰也爾雅釋言頰題也頰毛

詩作定

顛顏頰額也

額說文作額云頰也釋名額鄂也有垠塉也顛者爾雅釋言顛頂也釋畜駒頰白顛說文云駒馬白頰也方言頰頰顏頰也湘江之間謂之頰中夏謂之頰東齊謂之頰汝頰淮泗之間謂之顏玉篇引方言云江淮之間謂頰爲頰頰與顛聲近而義同顏者說文云眉目之間也廣雅釋親云顏頰也史記高祖本紀隆準而龍顏索隱引小爾雅顏頰也頰者易說卦傳震爲昞頰虞翻注云昞白頰額也廣雅釋親亦云頰頰也

璽謂之印

周禮掌節貨賄用璽節注云璽節今之印章也襄十九年左傳璽書追而與之注云璽印也古者大夫之印亦稱璽蔡邕獨斷云印曰璽秦以來天子獨以印稱璽又獨以玉羣臣莫敢用也廣雅釋

器云印謂之璽

紱謂之紱

說文云紱韍維也文選辨命論注引蒼頡云紱紱也玉篇云紱組也廣雅釋器云紱紱也案文選思元賦注引董巴輿服志云古者君臣珮玉尊卑有序及秦以采組結連於纒謂之紱是紱所以繫珮者禮記玉藻注云紱者所以貫佩玉相承受者也周禮幕人帟紱之事司農注云紱組紱所以繫帷者也故繫印之組亦謂之紱顏師古急就篇注云紱者受也所以承受印環也漢書匈奴傳授單于印紱注云紱者印之組也紱亦繫印之組故紱謂之紱也漢書諸侯王表奉上璽韍注云韍璽之組後漢書班固傳注引蒼頡云韍紱也漢書丙吉傳上將使人加紱而封之注云紱繫印之組也

堯廟碑李翊碑夏堪碑紱皆作紱

紱字說文無之諸書多假韍韍紱字

檐褕謂之童容

舊注亦云蔽膝

釋名云荊州謂禪衣曰布褐亦曰檐榆言其檐檐宏裕也說文云直裾謂之檐榆玉篇云檐榆直裾也童容亦作童裕方言云檐榆江淮南楚謂之童裕

案文選李善注引方言仍作童容

自關而西謂之檐榆其短

者謂之短榆廣雅釋器云童裕檐榆檐榆以直裾得名釋名謂取其宏裕衣裾直故有宏裕之象漢書何並傳注又云曲裾者非也謂之童容者古檐車亦有童容之名衛風氓云漸車帷裳箋云帷裳童容也疏云帷裳一名童容故巾車云重翟厭翟安車皆有容蓋鄭司農云容謂檐車山東謂之裳帷或曰童容以帷障車之旁如裳以爲容飾故或謂之帷裳或謂之童容釋名云童容童童也施之車蓋童童然以隱蔽形容也車帷謂之檐亦謂之童容直裾禪衣其形如帷故謂之檐榆亦謂之童容也舊注以檐榆爲蔽膝之裯非是

布褐而紕之謂之藍縷

舊注紕縫也晉人呼縫衣爲縷方言云楚謂凡人衣破醜敝爲藍縷

豳風七月無衣無褐箋云褐毛布也說文云絺縫也宣十二年左  
傳篳路藍縷注云藍縷做衣史記楚世家作篳路藍縷集解引服  
注云藍萋言衣做壞其萋藍藍然藍縷亦作縷縷說文縷稠謂之  
縷縷縷無緣也縷亦作縷說文云縷楚謂無緣衣也方言云縷謂  
之緻郭璞注云縷縷綴結也又云稠謂之縷注云祇稠做衣亦謂  
縷縷又云無緣之衣謂之縷又云楚謂無緣之衣曰縷絺衣謂之  
縷又云南楚凡人貧衣被醜弊或謂之縷縷又云襜衣以布而無  
緣做而絺之謂之縷縷案方言說文俱以縷縷爲無緣之衣小爾  
雅不云無緣但言布褐而絺之卽是無緣可知方言不云褐者與  
此可互見也

袴謂之褰

說文云褰袴也漢書司馬相如傳注云袴古袴字昭二十五年左  
傳徵褰與襦注云褰袴也說文云袴脛衣也釋名云袴跨也兩股

各跨別也方言云袴齊魯之間謂之襜或謂之襠關西謂之袴襜  
卽褰字也

蔽膝謂之裨

爾雅衣蔽前謂之檐郭注今蔽膝也案檐與裨同字儀禮士昏禮  
純衣纁裨注云裨亦緣也裨之言任也以纁緣其衣象陰氣上任  
也禮記雜記子羔之襲也繭衣與稅衣纁裨爲一釋文云裨裳下  
襖也王肅云婦人蔽膝也案王肅云然者以下文曾子譏襲婦服  
其實因儀禮纁裨是婦人之服謂不宜以纁爲緣耳非專謂裨是  
婦人之服王肅專以裨爲婦人蔽膝誤矣廣雅釋器云裨蔽郝也  
方言云蔽膝江淮之間謂之褱或謂之被魏宋南楚之間謂之大  
巾自關東西謂之蔽膝齊魯之郊謂之裨

帶之垂者謂之厲

舊注厲  
大帶也

小雅都人士垂帶而厲傳云厲帶之垂者桓二年左傳鞶厲游纓



注云厲大帶之垂者疏云大帶之垂者名之爲紳而復名爲厲者紳是垂之名厲是垂之貌方言云厲謂之帶郭璞注引小爾雅曰帶之垂者爲厲

大巾謂之冪

舊注莫狄切

說文云巾佩巾也禮記內則盥卒授巾注云巾以挽手周禮冪人職掌共巾冪注云共巾可以覆物疏云據經巾冪俱用鄭惟言共巾不共冪者但冪惟祇覆物其中則兼以拭物故特解巾可以覆物者也據此是拭物之巾容有大有小若冪惟祇覆物必用大巾故云大巾謂之冪方言幪巾也大巾謂之帟嵩嶽之南陳頴之間謂之帟亦謂之幪按凡覆物者謂之冪亦謂之幕故覆物之巾謂之幪亦謂之冪其義一也

覆帳謂之幄幄幕也

釋名云帳張也張施於牀上也又云幄屋也以帛依板施之形如

屋也周禮幕人注云四合象宮室曰幄王所居之帳也說文云帷在上曰幕周禮幕人注亦云在旁曰帷在上曰幕釋名云幕絡也在表之稱也淮南汜論訓燕雀處帷幄而兵不休息高誘注云幄幕也北堂書鈔百三十二卷引爾雅云覆帳謂之幄一切經音義卷九引小爾雅覆帳謂之幄幄幕也

### 簣牀第也

說文云簣牀棧也第牀簣也周禮玉府衽席牀第注云第簣也禮記檀弓大夫之簣與注云簣謂牀第也爾雅釋器簣謂之第郭注云牀版方言云牀齊魯之間謂之簣陳楚之間亦謂之第

### 大扇謂之翣

禮記少儀不翣也釋文引盧注云翣扇也淮南說林訓被裘而翣翼高誘注云翣扇也楚人謂之翣也是扇本有翣名故棺牆之扇亦謂之翣釋名云齊人謂扇爲翣此似之也謂如翣扇爲清涼也

鄭注喪大記引漢禮云嬰以木爲筐廣三尺高二尺四寸方兩角高衣以白布畫雲氣柄長五尺又檀弓注云嬰以木衣布如禩與疏謂禩如漢時之扇鄭以時驗言之是嬰形如扇而大故云大扇謂之嬰也

杖謂之挺

舊注史有白挺

說文云杖持也廣雅釋器云挺杖也孟子殺人以挺與刃注云挺杖也

鍵謂之籥

舊注局籥也亦作鑰

說文金部鍵字注云鍵鉉一曰車轄也又木部槩字注云槩限門也是門關之鍵當從木作槩月令修鍵閉呂覽及淮南子並作槩閉字尙不誤古門關之槩蓋皆以木爲之故字從木後或以金爲之故又从金作鍵經傳遂多作鍵周禮司門掌授管鍵司農注云鍵謂牡月令脩鍵閉注云鍵牡閉牝顏氏家訓書證篇引月令章

句曰鍵關牡也所以止扉廣雅釋室云鍵戶牡也禮記疏引何承天云鍵是門扇之後樹兩木穿上端爲孔閉者謂將扃關門以內孔中案凡物入者謂之牡受者謂之牝若如何說則鍵當是牝不當謂牡其義非也漢書五行志長安章城城門牡自亡牡卽鍵也鍵自是削木爲牡形納入孔中以閉門者今人門戶猶有鍵各但多以鐵爲之耳揚雄太元經閑次三關無鍵盜入門也說文以鍵爲限門限猶阻謂鍵可以阻門使不得開也文選風賦衝孔動鍵注引字林云鍵拒門也與限門同義謂之籥者籥當从說文作闌說文竹部籥字下云書僮竹筥也與鍵義無涉門部闌下注云以木橫持門戶闌下注云闌下牡也詳說文闌卽是扃闌乃下牡以固關而閉門者然則闌卽是鍵故揚雄謂雖有三關而無鍵猶不免於盜也其或从竹作籥者字之通借或從金作鑰者當亦後世有以金爲之者耳禮記樂記名之曰建橐注云建讀爲鍵字之誤

也

案鑿鍵之鍵說文作鍵

兵甲之衣曰鑿鍵鑿言閉藏兵甲也疏謂鍵是管

籥閉藏之名故讀爲鍵或以管籥或以鑿衣閉藏兵革故云鍵鑿也此尚不甚分鍵與籥爲二物若月令注以管籥爲搏鍵器疏謂管籥與鍵閉別文則非鍵閉之物檀弓疏謂鍵是鑿須張守節史記正義謂籥卽鑰匙胡三省通鑑注云管鍵也鑰關牡也今謂之鎖匙則皆以鍵與籥爲二物案管鍵之鍵不妨別爲鑿須要非限門之鍵管籥之籥不妨別爲鑿匙要非關牡之鑿必如說文之訓鍵與鑿爲一物與小爾雅義正合但字異耳方言云戶鑰自關而東陳楚之間謂之鍵自關而西謂之鑰義亦合也郭璞爾雅序釋文及疏並引小爾雅云鍵謂之鑰

棋局謂之弈

說文云棋博碁又云局促也一曰博所以行碁方言云所以行碁謂之局廣雅釋言云圍碁弈也方言云圍棋謂之弈自關而東齊

魯之間皆謂之弈說文云弈圍碁也一切經音義卷十七引小爾

雅云棋局謂之弈

在足謂之履履尊者曰達履謂之金鳥而金絢也

舊注禮黑履青絢赤鳥黑絢絢爲拘

也以爲行戒狀如刃衣鼻在履頭

說文云履足所依也釋名云履以足履之因以名之也方言云絲作之者謂之履小雅車攻赤芾金鳥傳云諸侯赤芾金鳥鳥達履也箋云金鳥黃朱色也疏云言金鳥達履者天官履人注云鳥有三等赤鳥爲上冕服之鳥下有白鳥黑鳥此云金鳥者卽禮之赤鳥也故箋云金鳥黃朱色加金爲飾故謂之金鳥白鳥黑鳥猶有在其上者爲尊未達其赤鳥則所尊莫是過故云達履言是履之最上達者也案豳風狼跋赤鳥几几傳云赤鳥人君之盛履盛履猶達履也周禮屨人青絢注云絢謂之拘著屨鳥之頭以爲行戒也儀禮士冠禮注云絢之言拘也以爲行戒狀如刃衣鼻在履頭

此金鈎者即所謂加金爲飾者也

*[Faint bleed-through text from the reverse side of the page, including characters like 此、者、即、所、謂、加、金、爲、飾、者、也、]*

小爾雅義證卷七

涇 胡承珙

廣器

射有張布謂之侯

舊注天子熊侯諸侯麋侯鄉大夫布侯言布侯者不采其地直於其侯正面畫虎豹頭而已

說文云侯春饗所射侯也从人从厂象張布矢在其下儀禮鄉射禮乃張侯注云侯謂所射布也疏云鄭知侯用布按下記云獸侯大夫士皆言布侯則餘賓射大射其侯皆用布此鄉射采侯二正亦用布可知鄉射記云凡侯天子熊侯白質諸侯麋侯赤質大夫布侯畫以虎豹士布侯畫以鹿豕注云此所謂獸侯也燕射則張之鄉射及賓射當張采侯二正而記此者天子諸侯之燕射各以其鄉射之禮而張此侯則經獸侯是也由是云焉白質赤質皆謂采其地其地不采者白布也周禮司裘注云所射正謂之侯者天子中之則能服諸侯諸侯以下中之則得爲諸侯考工記梓人爲



侯上兩個與其身三注云侯制上廣下狹蓋取象於人張臂八尺張足六尺是取象率焉案凡射侯皆用布說文所云春饗似專指大射蓋舉一以概其餘耳小雅正義云王肅引爾雅射張皮謂之侯皮字恐誤仍依今本作布爲是

侯中者謂之鵠

儀禮大射儀大侯之崇見鵠于參注云鵠所射之主周禮司裘注云侯者其所射也以虎熊豹麋之皮飾其側又方制之以爲臺謂之鵠著於侯中鄭司農云鵠鵠毛也方十尺曰侯四尺曰鵠元謂侯中之大小取數于侯道鄉射記曰弓二寸以爲侯中則九十弓者侯中廣丈八尺七十弓者侯中廣丈四尺五十弓者侯中廣一丈尊卑異等此數明矣考工記曰梓人爲侯廣與崇方參分其廣而鵠居一焉然則侯中廣丈八尺者鵠方六尺侯中丈四尺者鵠方四尺六寸大半寸侯中一丈者鵠方三尺三寸少半寸謂之鵠

者取名于鵠鵠鵠小鳥而難中是以中之爲雋亦取鵠之言較

較者直也射所以直己志禮記射義注云鵠之言梏也梏者直也

鵠中者謂之正正方二尺

舊注畫采謂之正棲皮謂之鵠方制獸皮帖於侯中如鳥之棲木畫五色於侯中爲

正內以朱方二尺次以白以蒼以黃以元

儀禮大射儀注云正者正也亦鳥名齊魯之間名題肩爲正正鵠

皆鳥之捷黠者齊風猗嗟傳云二尺曰正箋云正所以射於侯中

者天子五正諸侯三正大夫二正士一正外皆居其侯中三分之

一焉疏云經雖多言正鵠於正之廣狹則無文鄭以周禮考之以

爲大射則張皮侯而棲鵠賓射則張布侯而畫正正大如鵠三分

侯廣而鵠居一焉侯身長一丈八尺者正方六尺侯身一丈四尺

者正方四尺六寸大半寸侯身一丈者正方三尺三寸少半寸以

采畫爲之其外之廣雖則不同其內皆方二尺毛於正鵠之事唯

此言二尺曰正耳鄭言正之內方二尺者是中央之采方二尺以

外準其采之多少正之廣狹均而布之以至於外畔也周禮射人注云考工梓人職曰張五采之侯則遠國屬五采之侯卽五正之侯也畫五采之侯中朱次白次蒼次黃元居外三正損元黃二正去白蒼而畫以朱緣其外之廣皆居侯中三分之一中二尺今儒家云四尺曰正二尺曰鵠鵠乃用皮其大如正此說失之矣疏云賓射射正大射射鵠儒家以正鵠爲一解故鄭破之案此所稱儒家蓋指賈逵賓之初筵疏引周禮賈逵注云四尺曰正正五重鵠居其內而方二尺以爲正大於鵠鵠在正內雖內外不同亦共在一侯此以正中爲鵠與爾雅正相反鄭以周禮檢之以爲大射之侯其中制皮爲鵠賓射之侯其中畫采爲正正大如鵠皆居侯中三分之一其燕射則射獸侯侯中畫爲獸形卽鄉射記所謂熊侯白質之類是矣三射之侯皆不同也射人注說畫正之法其外之廣居侯中三分之一中言二尺與毛傳二尺曰正同也但賓射射

正大射射鵠經無明文不過注疏家自生區別正與鵠安知不共  
在一侯況參分侯廣而居一者經祇謂鵠而未嘗及正必謂正大  
如鵠亦未見其然既毛公鄭衆馬融王肅皆云二尺曰正此必有  
所受正自當在鵠中不分賓射大射亦無論鵠居侯中廣狹之數  
皆以二尺爲準疏家必謂二尺者是中央之采而其外之廣仍居  
侯中三分之一非也

正中者謂之槩槩方六寸

舊注槩  
倪結切

槩與臬同考工記注云槩古文臬假借字說文臬射準的也賓之  
初筵發彼有的傳云的質也疏云毛氏於射侯之事正鵠不明惟  
猗嗟傳云二尺曰正亦不言正之所施周禮鄭衆馬融注皆云十  
尺曰侯四尺曰鵠二尺曰正四寸曰質則以爲侯皆一丈鵠及正  
質於一侯之中爲此等級則亦以此質爲四寸也王肅亦云二尺  
曰正四寸曰質又引爾雅云射張皮

皮當爲布  
已見前

謂之侯侯中者謂

之鵠鵠中者謂之正正方二尺也正中謂之槩方六寸也舊云方四寸今云方六寸爾雅說之明宜從之此肅意惟改質爲六寸其餘同鄭馬也案肅所引卽此小爾雅蓋鵠及正槩皆在一侯於一侯之中遞爲差等但侯則取數於侯道鵠則取於侯中尺寸非一惟正及槩則皆以二尺及六寸者爲定無復差等故上文侯鵠不言尺寸而於此正與槩特言之也

棘戟也

小雅斯干如矢斯棘箋云棘戟也周禮掌舍爲壇壝宮棘門司農注云棘門以戟爲門說文戟有枝兵也从戈執周禮戟長丈六尺讀若棘據此是戟正字棘乃借字然經典相承多有作棘者故此釋之釋名云戟格也旁有枝格也文選吳都賦吳鉤越棘劉淵林注引小爾雅棘戟也又賈誼過秦論鋤耨棘矜陸士衡辨亡論長棘勁鍛李善注並引小爾雅棘戟也

鉞鉞斧也

鉞本作威大雅公劉干戈威揚傳云威斧也說文威戔也釋名威感也斧以斬斷見者皆感懼也鉞本作戔說文戔斧也引司馬法曰夏執元戔殷執白戔周左杖黃戔右秉白旄釋名戔戔也所向莫敢當前豁然破散也說文斧斫也鄭注檀弓云斧形旁殺刃上而長六韜軍用篇大柯斧刃長八寸重八斤柄長五尺以上一名天鉞伐木天斧重八斤柄長三尺以上

干戣盾也

方言盾自關而東或謂之干或謂之戣爾雅干扞也孫炎注云干盾自蔽扞說文戣盾也戣與干通說文又云戣盾也周書王會篇鮫戣利劔爲獻秦風小戎蒙伐有苑傳云伐中干也疏云櫓是大楯故以伐爲中干釋文云伐本作戣文選吳都賦去戣自閭劉淵林注云戣盾也史記孔子世家矛戟劔撥索隱云撥謂大盾也蘇

秦列傳革抉跋芮索隱云跋與馘同案伐戲撥跋並與馘通釋各云盾遯也跪其下避刃以隱遯也

戈鉤子戟也

大雅公劉干戈威揚箋云戈句子戟也考工記冶氏戈廣二寸內倍之胡三之援四之注云戈今句子戟也或謂之雞鳴或謂之擁頸內謂胡以內接秘者也長四寸胡六寸援八寸戈句兵也主於胡也俗謂之曼胡以此鄭司農云援直刃也胡其子案說文戈平頭戟也从弋一橫之象形戈既爲平頭戟其鋒當橫出卽所謂援援者引也橫出乃可用以句引故謂之句兵先鄭以援爲直刃非是援近秘處折而下垂者爲胡如喉承頰折而直下也援兩面有刃胡則近援者有刃近內者無刃故又謂之子說文子無右臂也先鄭以胡爲子此語不誤然則漢時以戈爲句子戟者句卽考工記之援子卽考工記之胡釋名云戈過也所刺擣則決過所鉤引

則制之弗得過也所刺擣蓋謂其援所鉤引蓋謂其胡方言云戟楚謂之矛凡戟而無刃秦晉之間謂之鈇或謂之鎡吳揚之間謂之戈東齊秦晉之間謂其大者曰鏐胡其曲者謂之鉤鈇鏐胡案無刃者謂無枝刃也故方言云三刃枝南楚宛郢謂之匿戟冶氏云戟廣寸有半寸內三之胡四之援五之倨句中矩與刺重三鋒注戟今三鋒戟也三鋒者胡直中矩言正方也鄭司農云刺謂援也元謂刺者著秘直前如鐔者也戟胡橫貫之此云三鋒戟正與方言三刃枝相合蓋戟有胡有援有刺故謂之三鋒戈則有援有胡而已援卽爲句胡卽爲子故謂之句子戟也

刀之鞘謂之室室謂之鞞鞞鞞之飾也

舊注鞞佩刀削  
鞞上飾鞞下飾

釋名刀其室曰削削階也其形階殺裏刀體也方言劍削自關而東謂之削自河而北燕趙之間謂之室案削或作鞘一切經音義

卷十二卷十四並云小爾雅作鞘近本乃作削今訂正說文云削



鞞也鞞刀室也廣雅鞞刀削也小雅瞻彼洛矣鞞琫有珌傳云鞞容刀鞞也疏云古之言鞞猶今之言鞘方言云劍削自關而西謂之鞞鞞與鞞同大雅公劉鞞琫容刀傳云下曰鞞上曰琫疏云鞞者刀鞘之名琫者鞘之上飾下不言其飾指鞞之體故云下曰鞞據此知鞞爲刀室原不得以飾名藝文類聚引字林云鞞佩刀上飾殊誤鞞本作琫說文琫佩刀上飾天子以玉諸侯以金釋名云刀口之飾曰琫琫捧也集韻琫或作鞞桓二年左傳藻率鞞鞞杜注云鞞佩刀削上飾鞞下飾此與藝文類聚引字林以鞞爲佩刀上飾琫爲佩刀下飾誤同劉炫故據詩傳以規杜過孔穎達於詩疏云鞞者刀鞘琫爲在上之飾而於傳疏則云鞞鞞或上或下俱是殆未免曲徇杜氏也舊注珌上飾鞞下飾亦同其誤說文云珌佩刀下飾天子以玉瞻彼洛矣傳云琫上飾珌下飾天子玉琫而珌珌諸侯璜琫而璆珌大夫鐻琫而鏐珌士瑒琫而瑒珌玉篇珌通作璆

太平御覽引字林云瑋佩刀飾不分上下殊混釋各云瑋佩刀下

飾蓋瑋字傳寫又誤作瑋耳

詩釋文云瑋字又作瑋是瑋與瑋同與瑋異玉篇以瑋爲卽瑋字

矢服謂之弣

周官司弓矢中秋獻矢服注云服盛矢器也以獸皮爲之方言云所以盛箭弩謂之服說文云弣弓衣也文十六年左傳中項伏弣哀二年傳伏弣嘔血注並同案諸書多以弣爲弓衣服爲矢房齊語云弣無弓服無矢尤爲明晰似不當以服爲弣然弓藏矢藏之名各有專屬而皆可以互通廣雅云鞬橐韜韜弓藏也而說文云鞬所以戢弓矢也韜劔衣也韜弓矢韜也左傳國語並以橐爲矢房廣雅又云搃医牘虡矢藏也而說文云医盛弓弩矢器也鄭注士冠禮云今時藏弓矢者謂之櫝丸據此知服與弣對文則別散文皆可通也

小船謂之艇

方言云小艚謂之艇釋名云二百斛以上曰艇艇挺也其形徑挺一人二人所乘行者也淮南子倣真訓越舸蜀艇高誘注云蜀艇一板之舟若今豫章是也

艇之小者曰艇

方言云艇短而深者謂之艇注云艇今江東呼艇艇者音步案後世所謂艇艇者乃大船如梁書羊侃傳于兩艇艇起三間通梁水齋又陳書侯景傳以舡舫貯石沈塞淮口舡舫亦艇艇也皆與此艇之小者不同說文無艇字當作泝水部云泝編木以渡也爾雅釋言舡泝也詩釋文引郭注小筏曰泝爾雅音義云泝亦作泝泝艇字相近耳

船頭謂之舡尾謂之舡

案說文諸書多以舡爲船尾舡爲船頭惟文選吳都賦宏舡連舡巨艦接舡劉淵林注云舡船前也舡船後也戴東原謂前後二字

互譌今案說文輶輶車前橫木也方言云輶謂之軸車前謂之軸船前謂之舳聲義相近玉篇云艦在船後廣韻亦云艦舟後蓋舳艦前後本可互名故諸書訓各不同與

### 楫謂之橈

說文楫舟櫂也釋名云船其尾曰柁在旁曰櫂在旁撥水曰櫂又謂之楫楫捷也撥水使船捷疾也漢書元后傳楫濯越歌文選吳都賦篙工楫師楫楫並與楫通淮南主術訓夫七尺之橈而制船之左右者以水爲資橈與橈同王逸楚辭注云橈船小楫也後漢書岑彭傳注引爾雅楫謂之橈

### 車轅上者謂之轡

方言云車轡齊謂之轡說文害車軸端也亦作轡廣雅釋器云轡轡轡也史記田單列傳令其宗人盡斷其軸末而傅鐵籠籠與轡通是轡爲車軸末之名此云轅上者謂之轡未詳

轅謂之軻

說文轅軻也釋名轅援也車之大援也軻句也轅上句也方言云轅楚衛之間謂之軻

軻謂之枕

說文軻車後橫木也考工記車軻四尺注云軻輿後橫木也方言云軻謂之枕

較謂之幹

考工記輿人以其隧之半爲之較崇注云較兩轡上出式者疏云較謂車輿兩箱今人謂之平鬲也釋名云車較在箱上爲辜較也謂之幹者凡物在兩旁者皆名幹故兩脅謂之幹爾雅釋詁翰幹也舍人注云翰所以當牆兩邊障土者也費誓峙乃楨幹馬融注云楨幹皆築具楨在前幹在兩旁成二年左傳棺有翰檜注云翰旁飾皆與較謂之幹義相近說文鞶并垣也从韋取其巾也文選

注引司馬彪莊子注云并幹并闌也漢書成帝紀大較獵注云較獵者大爲闌較以遮而獵取也并闌謂之幹禽獸之闌謂之較故車闌謂之較亦謂之幹矣

衡軛也軛上者謂之烏啄

釋名云衡橫也橫馬頸上也軛一作鬲考工記車人注云鬲謂轅端壓牛領者說文軛轅前也急就篇旣言軛衡又言軛縛軛與衡似爲二物然考工記軛人衡任者注云謂兩軛之間論語集解引包注謂衡卽軛則衡與軛本是一物言其制謂之衡言其用謂之軛耳釋名云橛扼也所以扼牛頸也馬曰烏啄下向義馬頸似烏開口向下啄物時也此文軛上者謂之烏啄上疑下字之譌軛下別有曲木縛於軛以壓馬頸謂之烏啄者以形得名軛非卽烏啄若大雅韓奕幃革金厄厄卽軛毛傳訓爲烏蠟烏蠟亦卽烏啄以相近故移其名如軛本轂末之名而軸末亦謂之軛亦以相近故

名同耳鳥啄一名鞫說文鞫軛下曲者襄十四年左傳射兩鞫服注車軛兩邊又馬頸者是也一切經音義卷三卷十七並引小爾雅衡梘也梘與軛同

纒綳也

易大壯九三羝羊觸藩羸其角馬融曰羸大索也王肅本作縲音螺鄭虞作纒蜀才作累張璠作纒案說文纒大索也與馬訓同蓋纒正字羸累等並借字論語雖在縲紲之中史記仲尼弟子列傳作累漢書司馬遷傳作纒並字異而義同急就篇云纒縲繩索絞紡纒者襄九年左傳具纒缶注云纒汲索疏云纒縲縲也此卽用小爾雅文說文纒汲水繩也縲纒也方言云縲自關而東周洛韓魏之間謂之纒或謂之絡關西謂之縲

絡索也

方言云車紂自關而東周洛韓鄭汝潁之間或謂之曲縲注云縲

亦繩名詩曰宵爾索綯案綯與縉字異而音義同爾雅綯絞也李  
巡注縉繩之絞也廣雅綯索也蓋索謂之縉猶編絲繩謂之條矣  
大者謂之索小者謂之繩

說文云繩索也案索與繩散文則通對文則別文選注引字林云  
糾兩合繩纏三合繩漢書注引臣瓚曰纏索也此大者爲索之證  
也一切經卷十七引小爾雅大曰索小曰繩

詘而戾之謂紆

說文云紆紆未縈繩儀禮士喪禮不績注云績讀爲紆屈也江沔  
之間謂縈收繩索爲紆詘古屈字見漢書揚雄傳音義說文云戾曲也

縈而紆之爲縈

說文云縈系也案縈本系物之名因而所用以系者亦謂之縈僖  
二十四年左傳臣負羈縈注云縈馬韉又服注云犬韉曰縈是也  
縈而紆之者儀禮喪服傳不縈垂注云不絞其帶之垂者說文云



珍轉也淮南本經訓以相繆紛高誘注云繆紛相纏結也

垆地也

說文云邑外謂之郊郊外謂之野野外謂之林林外謂之囗象遠界也古文作囗从口象國邑或从土作垆爾雅作垆魯頌在垆之野傳云垆遠野也說文蓋據爾雅毛傳爲說此文地上疑脫遠字蓋邑外之地以垆爲最遠也

墉牆謂之陴

說文墉城垣也陴城上女牆俾倪也釋名云城上垣曰睥睨言於其孔中睥睨非常也亦曰陴陴裨也言裨助城之高也亦曰女牆言其卑小比之於城若女子之於丈夫也廣雅云埤垆女牆也左傳但作陴宣十二年傳守陴者皆哭國語又作埤晉語云反其埤墨子脩城門篇云俾倪廣三尺高二尺五寸案俾倪睥睨埤垆雖二字連文合聲則皆爲陴故左傳但謂之陴陴與庫同倪亦庫也

爾雅龜左倪不類右倪不若郭注以左倪爲左庫右倪爲右庫故蒼頡篇又但作塊云塊城上小垣也

高平謂之太原

爾雅廣平曰原高平曰陸說文遠廣平之野人所登陸高平地釋名與爾雅同小雅皇華于彼原隰傳則云高平曰原周禮大司徒鄭注同定四年左傳杜注引爾雅又作廣平曰陸水經汾水注引春秋說題辭云高平曰太原原端也平而有度又引尙書大傳云大而高平者謂之太原然則原陸皆高而廣平者故諸家稱引互見其文與

汪池也

舊注左傳尸諸周氏之汪

說文汪深廣也一曰池也桓十五年左傳尸諸周氏之汪僖二十三年傳覆于周氏之汪一切經音義卷十五引小爾雅汪池也

水之北謂之汭

案汭字訓各不同說文汭水相入也水經河水注引馬注尙書云水所入曰汭渭水注引王肅云汭入也禹貢疏引鄭注云汭之言內也又洛誥疏引鄭注云汭隈曲中也莊四年左傳杜注云汭內也閔元年傳注云水之隈曲曰汭至水北之訓惟見于小爾雅東晉古文尙書孔傳訓汭字卽本此汭之名固未可專屬水北然水北曰汭古人自有此名召誥攻位于洛汭疏云漢書地理志河南郡治在洛陽縣河南城別爲河南縣治都邑之位於洛北今於河南城是也且水北與汭內之訓亦不相礙河內曰冀州州在河北也漢中郡亦在漢水之北胡氏渭曰詩大雅芮鞮之卽芮卽職方涇汭之汭水名也漢志扶風汭下云芮水出西北東入涇詩芮隄雍州川也師古曰隄讀與鞮同余因而悟水北爲汭之義蓋涇水東南流至邠州長武縣北汭水由平涼府靈臺縣界流經縣內而東注于涇公劉所居故豳城正在二水相會內曲之處及其後人

衆而地不能容又營其外以居之故云止旅乃密芮鞠之卽箋云水之內曰隩水之外曰鞠外卽南內卽北也史記周本紀武王曰自洛汭延于伊汭逸周書作雒解曰乃作大邑成周于土中城方千七百二十丈郭方七百里南繫于洛水云南繫于洛水則在洛北故召誥謂之洛汭也又雍州有二渭汭從孔義則凡渭北之地皆爲渭汭涇屬渭汭當爲漢高陵縣地後會于渭汭當爲漢襄德縣地同一渭汭而前後所指各別經豈支離若是耶曰地異而其爲渭汭則同高陵者涇渭二水之會也襄德者河渭二水之會也均爲水北均爲水相入均爲水之隈曲渭汭兼地而言不專指水名也承珙案大雅芮鞠之卽傳云芮水涯也箋云芮之言內也釋文芮本又作汭鄭云水內卽是水北蓋以南面言之則北爲內也鹽鐵論文學曰荆揚南有桂林之饒內有江湖之利左陵陽之金右蜀漢之材亦是以北爲內至如左氏莊四年曰漢汭閔二年曰

渭汭宣八年曰滑汭昭元年曰洛汭四年曰夏汭五年曰羅汭二  
十四年曰豫章之汭二十七年曰沙汭定四年曰淮汭哀十五年  
曰桐汭諸言汭者或爲水北或爲水所入與其隈曲處當時因勢  
立名固不必專於一訓也

澤之廣謂之衍

案衍本有廣訓易繫辭傳大衍之數五十釋文引王蜀注云衍廣  
也周禮大司徒注云下平曰衍襄二十五年左傳賈逵注同釋名  
亦云下平曰衍言漫衍也楚辭九歎巡陵夷之曲衍兮王逸注云  
衍澤也蓋衍本不專是澤名以有廣義故澤之廣者通名焉左傳  
地名有昌衍瓜衍戰國策有卷衍蒲衍水經注有杜衍漢書有鄜  
衍疑皆澤名也

小爾雅義證卷八

涇 胡承珙

廣物

藁謂之稗稗謂之芻生曰芻

說文藁稗也稗禾莖也周官封人共其水藁禮記祭統士執芻注云芻謂藁也稗或从干作秆昭二十七年左傳或取一秉秆焉注云秆藁也莊子齊物論釋文引小爾雅秆謂之芻正作秆一切經音義卷二卷十七則引小爾雅稗謂之芻案芻者所以飼牛馬此云生曰芻者疑是對藁而言淮南時則訓案芻藁高誘注云草養曰芻穀養曰藁禮記月令疏引王肅亦曰食草曰芻食穀曰藁今以穀養牛馬羊豕或熟而飼之草則以生飼之故曰生曰芻也一切經音義引小爾雅稗謂之芻所以飼獸曰芻生曰生芻今本無所以飼獸曰芻六字生曰下亦無生字

穀謂之粒

周頌思文立我烝民箋云立當作粒昔堯遭洪水黎民阻飢后稷播殖百穀烝民乃粒是穀食乃謂之粒王制有不粒食者矣謂不穀食也一切經音義引通俗文亦云穀曰粒

菜謂之蔬

說文云菜草之可食者蔬本作疏淮南主術訓秋畜蔬食高誘注云采蔬曰疏莊子山木篇猶且胥疏於江湖之上下釋文引司馬彪注云蔬菜也

禾穗謂之穎

說文采禾成秀也或作穗淮南繆稱訓夫子見禾之三變也高誘注云三變始于稟生于苗成于穗也說文穎禾末也禮記少儀刀卻刃授穎又枕几穎杖疏云刀之在手謂之爲穎禾之秀穗亦謂之爲穎枕之警動亦謂之爲穎其實雖異大略同也文選西都賦

五穀垂穎文賦或苕發而穎豎李善注並引小爾雅曰禾穗謂之穎後漢書班固傳章懷注引同

截穎謂之銍

舊注刈禾鐮曰銍

周頌良耜穫之挫挫說文挫穫禾聲也爾雅作銍釋訓云銍銍穫也案大雅生民疏引鄭注尙書云二百里銍銍謂刈穗斷去藁也又三百里結結謂禾又去其穎鄭以銍結有刈穗去穎之別此卽以截穎爲銍者蓋穎與穗對文則別散文則通耳又案說文銍穫禾短鐮挫穫禾聲二字分析最明周頌臣工奄觀銍刈及爾雅釋訓皆當作挫今多作銍者乃是假借爲之故書疏云禾穗用銍以刈故以銍表禾穗其實穫禾之鐵當作銍截禾之穎當作挫周頌釋文及正義引小爾雅截穎謂之銍作銍惟爾雅釋文及邢昺疏引小爾雅作挫據文當本作挫近本小爾雅作銍舊注亦作銍

拔心曰擷拔根曰擷



方言云握擢拔也東齊海岱之間曰握自關而西或曰拔或曰擢  
郭璞注云今呼拔草心爲握孟子宋人有閔其苗之不長而握之  
者趙岐注握挺拔之欲急長也爾雅釋木釋文引小爾雅云拔根  
曰擢邢疏引同

把謂之秉四秉曰筥筥十曰稷

舊注秉握也筥  
稷乃多少之差

此謂禾稟之數與廣量篇不同聘禮記四秉曰筥十筥曰稷十稷  
曰秬四百秉爲一秬鄭注云此秉謂刈禾盈手之秉也筥穡名也  
若今萊陽之間刈稻聚把有名爲筥者詩云彼有遺秉又云此有  
不斂穢一車之禾三秬爲千二百秉三百筥三十稷也古文稷作  
纒案此云把謂之秉者小雅彼有遺秉傳云秉把也說文秉禾秉  
也从又持禾秝部云兼持二禾秉持一禾司馬彪注莊子云一手  
曰把故云把謂之秉也四秉曰筥十筥曰稷與聘禮記正同鄭注  
周禮掌客云聘禮曰四秉曰筥十筥曰稷十稷曰秬每車三秬則

三十稷也稷猶束也米禾之秉筥數同字異禾之秉手把耳筥讀爲棟栝之栝謂一積也稷周禮釋文作總總本聚數之名聚絲謂之緩聚禾謂之稷禾細枝亦謂之菱其義一耳說文禾下云周禮二百四十斗爲秉四秉曰筥十筥曰稷十稷曰秬此既誤以禾束之秉爲量名之秉又以車米秉有五數之數爲一秉之數則所謂一車三秬者當有二萬八千八百斛何以能載韋昭國語注以稷禾爲六百四十斛秉芻爲一百十六斗不知禾稹之數焉能計以斗斛其誤與說文略同廣雅釋器鍾十曰甝甝十曰秉下卽承以秉四曰筥筥十曰稷稷十曰秬亦不知秉筥有米禾之別惟小爾雅此條與周儀二禮及鄭注皆合稷近本及舊注皆作稷今據韻會筥字下引小爾雅訂正

棘實謂之棗

說文棘小棗叢生者从竝東棗羊棗也从重東魏風園有棘傳云

棘棗也呂覽云棗棘之有裘狐之有食棘之棗衣狐之裘先王固用非其有而已有之水經注酸棗縣故城古韓國昔天子建國名都或以山林故豫章以樹氏都酸棗以棘名邦古詩甘瓜抱苦蒂美棗生荆棘禮記昏義釋文引爾雅云棘實謂之棗

桑之實謂之甚

說文甚桑實也黹桑實之黑也案文選注引聲類云黹深黑色桑實謂之甚正以其色名之故魯頌桑甚字通作黹東觀漢記王莽之亂人相食蔡君仲取桑椹異器賊問所以君仲曰黑與母赤自食蓋桑甚始青終赤至熟乃黑而甘故以黑者爲美王禎農書云荆桑多甚魯桑少甚此地氣之殊也

柞之實謂之椽

大雅緜柞械拔矣箋云柞櫟也爾雅釋木櫟其實椽詩疏引孫炎注云櫟實椽也有椽橐自裹也爾雅云栩柔郭注柞樹也唐風摛

羽集于苞栩陸璣疏云今柞櫟也徐州人謂櫟爲杼或謂之爲栩其子爲阜斗其殼爲汁可以染阜今京洛及河內多言杼汁謂櫟爲杼五方通語也案栩杼同音杼與橡又一聲之轉說文栩柔也从木羽聲其阜一曰樣樣栩實也樣卽橡字又云阜斗櫟實也一曰象斗鄭注周官掌染草云藍蒨象斗之屬是橡本作象今案橡似桌而圓近蒂處有椽彙自裹謂之象斗可用以染其實如小桌而微長者爲杼與橡相似而微不同要之皆柞實也

小爾雅義證卷八

小爾雅釋詁第八

一曰

怨

怨

怨

怨

怨

怨

怨

怨

怨

怨

小爾雅義證卷九

涇 胡承珙

廣鳥

去陰就陽者謂之陽鳥鴻雁是也

禹貢陽鳥攸居鄭注陽鳥鴻雁之屬隨陽氣南北小雅鴻雁于飛傳云大曰鴻小曰雁爾雅釋詁鴻代也郭璞注云鴻雁知運代周官大宗伯大夫執雁注云雁取其候時而行儀禮士相見禮注云雁取知時飛翔有行列也禮記昏義注云雁是隨陽之鳥妻從夫之義也古微書引春秋說題辭云鴈之言雁雁起聖以招期知晚蚤故南北以陽動也

純黑而反哺者謂之慈鳥

藝文類聚引春秋元命包曰火流爲鳥孝鳥也初學記引春秋運斗樞云飛翔羽翮爲陽陽氣仁故鳥哺公也後漢書趙典傳云鳥

烏反哺報德文選典引三足軒翥于茂樹注引蔡邕注云烏反哺之鳥至孝之應也易林隨之大壯云慈烏鳴鳩執一無尤案文選東哲補亡詩嗷嗷林烏受哺于子李善注引小爾雅純黑而反哺者烏也盧子諒贈劉琨詩注引小爾雅曰純黑而反哺者謂之烏後漢書趙典傳注引同惟爾雅釋鳥釋文及水經灤水注並引小爾雅純黑而反哺者謂之慈烏烏上多慈字近本脫今據補

小而腹下白不反哺者謂之鴉烏白項而羣飛者謂之燕烏燕烏白

脰烏也鴉烏鸞也

舊注鸞斯也亦曰鸞鵲

鴉當作雅說文雅楚烏也一名鸞一名卑居秦謂之雅水經灤水注云爾雅鸞斯卑居也孫炎曰卑居楚烏犍爲舍人以爲壁居說文謂之雅雅楚烏莊子曰雅賈矣馬融亦曰賈烏也小雅弁彼鸞斯傳云鸞斯卑居卑居雅烏也釋文引小爾雅云小而腹下白不反哺者謂之鴉烏爾雅釋鳥鸞斯鸞鵲郭注云鴉烏也小而多羣

腹下白江東亦呼爲鶻鳥釋文亦引小爾雅云小而腹下白不反  
哺者謂之鴉鳥邢疏引同釋鳥又云燕白脰鳥郭注云脰頸邢疏  
引小爾雅云白項而羣飛者謂之燕鳥燕鳥白脰鳥也又案水經  
灤水注引小爾雅云小而腹下白不反哺者謂之雅鳥白脰而羣  
飛者謂之燕鳥又多大而白脰者謂之蒼鳥句近本脫之

小爾雅義證卷九



小書

八

八

PDF

小爾雅義證卷十

涇 胡承珙

廣獸

豕彘也彘豬也

說文豕彘也竭其尾故謂豕象毛足而後有尾讀與豨同彘豕也後蹠廢謂之彘方言云豬關東西或謂之彘或謂之豕南楚謂之豨爾雅豕子豬郭注今亦曰彘江東呼豬皆通各說文云豬豕而三毛叢居者蓋豬爲豕子又爲豕之通稱也爾雅釋文引小爾雅云彘豬也邢疏同


其子曰豚

說文豚小豕也爾雅釋文引字林同方言云豬其子或謂之豚或謂之豚吳揚之間謂之豬子爾雅疏引小爾雅云其子曰豚豕之大者謂之豨豨小者謂之縱

珍做宋版印

說文豨三歲豕肩相及者豨生六月豚一曰一歲曰豨尚叢聚也  
豨風七月獻豨于公傳云三歲為豨周禮大司馬注引作獻肩于  
公豨正字肩借字召南騶虞一發五豨傳云一歲為豨故云小者  
謂之豨也按齊風還傳云三歲曰豨魏風伐檀傳又云三歲曰特  
王肅以為三歲者有二名鄭司農注大司馬云一歲為豨二歲為  
豨三歲為特四歲為肩五歲為慎廣雅云獸一歲為豨二歲為豨  
三歲為肩四歲為特雖互有異同要之豨大而豨小則其大較也  
爾雅釋畜豕五尺為豨郭注引尸子曰大豕為豨今漁陽呼豬大  
者為豨釋文引小爾雅云豕之大者謂之豨豨近本無豨字今據  
補又釋獸釋文引小爾雅云豕小者曰豨  
鳥之所乳謂之窠雞雉所乳謂之窠

說文鳥在木上曰窠窠空也穴中曰窠廣雅云窠窠也文選蜀都  
賦曰窠宿異禽廣雅又云科空也科與窠同其專指雞雉所乳為

窠者爾雅雞棲于杙爲堞鑿垣而棲爲峙堞與峙皆在穴之義呂氏春秋至忠篇楚莊王獵于雲夢射隨兕而獲之說苑作科雉隨兕科雉不見他書案科雉疑卽窠雉一切經音義云窠古文作二形謂雉之雞者雉本窠居故甫出窠者謂之科雉然則隨兕者或兕之犢與一切經音義卷一卷三卷七並引小爾雅鷄雉所乳謂之窠又多兔之所息謂之窟句又陸佃埤雅引小爾雅兔之所息謂之窟鹿之所息謂之場今本並脫

魚之所息謂之櫓櫓也積柴水中而魚舍焉

周頌潛有多魚傳云潛櫓也釋文云櫓素感反舊詩傳及爾雅本並作米旁參小爾雅云魚之所息謂之櫓櫓也謂積柴水中令魚依之止息因而取之也郭景純因改爾雅從小爾雅作木旁參音霜甚反爾雅釋器櫓謂之泚釋文云泚郭岑潛二音詩作潛字小爾雅作櫓字亦音潛又時占反猶取積柴之義據此明云小爾

雅本作櫓近本仍作魚之所息謂之潛誤矣今據以訂正說文櫓以柴木澮水也郭璞江賦云櫓澮爲涔涔潛古今字櫓與櫓義亦相近又案詩疏引孫炎爾雅注亦云積柴養魚曰櫓釋文云字林作櫓淮南說林訓櫓者扣舟高誘注云櫓者以柴積水中以取魚魚聞擊舟聲藏柴下因而取之也櫓讀沙糝今杭州人積柴水中捕魚爲櫓幽州名之爲涔也糝又謂之笊莊子外物篇笊者所以在魚釋文云積柴水中使魚依而食焉是糝卽笊也

小爾雅義證卷十

小爾雅義證卷十一

涇 胡承珙

廣度

案直齋書錄解題云自廣詰至廣獸凡十章又度量衡爲三章據此知舊本自此以下三章篇目無廣字殆後人因

前十章有廣字而加之與

跬一舉足也

跬說文作𨇗云半步也讀若跬同莊子駢拇篇釋文引司馬本亦作𨇗禮記祭義故孝子頃步而弗敢忘孝也注云頃當爲跬聲之誤釋文云一舉足爲跬荀子勸學篇不積跬步楊倞注云半步曰顛漢書息夫躬傳未有能窺左足蘇林曰窺音跬師古曰跬半步也言一舉足也小夏箋無進於跬步疏引小爾雅一舉足謂之跬儀禮鄉射記射自楹間物長如筈注云筈矢幹也長三尺與跬相應疏云一舉足謂之跬再舉足謂之步射者履物不過一跬故知以三尺爲限也太平御覽卷八百三十引孔叢子曰跬一舉足也

倍跬謂之步

舊注司馬法六尺爲步倍跬乃其大略

周禮小司徒注引司馬法云六尺爲步禮記坊記疏引異義古春秋左氏說同禮記王制疏云古者八寸爲尺以周尺八尺爲步則一步有六尺四寸今以周尺六尺四寸爲步則一步有五尺二寸御覽八百三十引孔叢子曰倍跬謂之步

四尺謂之仞

周禮匠人疏云澮廣二尋深二仞若以孔安國八尺曰仞則澮亦廣深等但度廣以尋度深以仞故別言之若王肅依爾雅四尺曰仞深二仞八尺與廣二尋不類鄭以仞七尺淺于廣二尋二尺古以涂爲大故宜淺校二尺與溝洫不得相類也儀禮注七尺曰仞疏云七尺曰仞者無正文王肅則依小爾雅四尺曰仞孔君則八尺曰仞所見不同也案仞數諸儒各異漢書食貨志注又引應劭以五尺六寸爲仞此仍與七尺曰仞者合蓋用八寸爲尺以七乘

八故爲五尺六寸若王肅之依爾雅則自別爲四尺之仞黃生義  
府云四尺曰仞倍仞曰尋此正義也蓋人伸兩臂以度謂之尋尋  
八尺也但伸一臂則謂之仞仞四尺也孔安國以爲八尺何緣一  
度立二名耶鄭元以爲七尺應劭以爲五尺六寸並無依據今按  
孟子掘井九仞本書作仞而不及泉以四乘九爲三丈六尺此尋常掘  
井之數若以八乘九則爲七丈二尺世未有掘井至七丈餘尙不  
得水不得水而猶掘至七丈餘者孟雖假喻然不應昧於物理如  
此又禮蠶室近川而爲之築宮仞有三尺蓋蠶室貴謹密還風日  
故特低也史記集解引爾雅云四尺謂之仞莊子人間世篇庚桑  
楚篇釋文並引小爾雅云四尺曰仞一切經音義卷二十五引小  
爾雅四尺爲仞御覽八百三十引孔叢子曰四尺謂之仞

倍仞謂之尋尋舒兩肱也

說文尋度人之兩臂爲尋八尺也儀禮鄉射記以鴻脰韜上一尋



注云八尺曰尋疏云八尺曰尋者亦無正文冬官云車有六等之數爰長尋有四尺長丈二而云尋有四尺除四尺則尋長八尺矣大戴禮主言篇布指知寸布手知尺舒肘知尋一切經音義引古文尋作𠄎字从肘从尺正舒兩肱之義淮南天文訓云音以八相生人脩八尺尋自倍故八尺而爲尋案今本淮南此語有誤人修八尺尋倍之則尋爲丈有六尺矣不當云八尺爲尋惟一切經音義引淮南云人臂四尺尋自倍故八尺曰尋此最諦當史記集解引爾雅云倍仞謂之尋一切經音義卷二十五引小爾雅倍仞曰尋御覽八百三十引孔叢子曰倍仞謂之尋尋舒兩肱也

### 倍尋謂之常

考工記爰長尋有四尺崇于人四尺謂之四等車戟常崇於爰四尺謂之五等注云八尺曰尋倍尋曰常疏云此經皆以四尺爲差人長八尺而爰長尋有四尺崇于人四尺則八尺之外惟有四尺

在是尋長八尺可知及長丈二而云車戟常崇于及四尺則丈二之外有四尺總丈六尺是倍尋曰常也一切經音義卷二十五引小爾雅倍尋曰常御覽八百三十引孔叢子曰倍尋謂之常

五尺謂之墨

國語周語其察色也不過墨丈尋常之間韋昭注云五尺爲墨華嚴經音義引纂要亦云五尺曰墨御覽八百三十引孔叢子曰五尺謂之墨

倍墨謂之丈

說文丈十尺也从又持十淮南天文訓云音以當日日之數十故十寸而爲尺十尺而爲丈國語韋注云倍墨爲丈御覽八百三十引孔叢子曰倍墨謂之丈

倍丈謂之端倍端謂之兩

周官媒氏純帛無過五兩注云五兩十端也雜記曰納幣一束束

五兩兩五尋然則每端二丈疏云古者二端相向卷之共爲一兩五兩故十端也云納幣一束束五兩兩五尋者尋八尺則一兩四十尺五兩四五十總二百尺故鄭云然則每端二丈若餘行禮則用制幣丈八尺取儉易供此昏禮每端二丈取誠實之義故以二丈整數爲之也御覽八百三十引孔叢子曰倍丈謂之端倍端謂之兩

倍兩謂之匹

說文匹四丈也淮南天文訓音之數五以五乘八五八四十故四丈而爲匹匹者中人之度也一匹而爲制禮記雜記納幣一束束五兩兩五尋注云五兩五尋則每卷二丈也合之則四十尺今謂之匹猶匹偶之云與漢書食貨志布帛廣二尺二寸爲幅長四丈爲匹案匹卽兩也兩與匹特古今語耳此云倍兩謂之匹則是八丈與諸書不合疑是承上句倍端謂兩而言以廣衡篇倍舉曰鈔

鉞謂之緩二語例之此蓋本是兩謂之匹而傳寫者誤衍一倍字與御覽八百三十引此句亦多倍字

匹有謂之束

舊注禮元纁五兩以兩爲束每束兩兩卷之二丈雙合則成匹凡十卷爲五束以應天九地十之數與此制異

焉

易賁束帛箋釋文引子夏傳云五匹爲束湘山野錄引賈服易說亦云束帛五匹儀禮士冠禮束帛儷皮注云束帛十端也聘禮釋幣制元纁束奠于几下注云凡物十曰束疏云案昏禮元纁束則每卷二丈自餘行禮一束者每卷一丈八尺爲制幣帛錦十卷者皆名束至於脯十脰亦曰束故云凡物十曰束也案束爲五匹此有字下當有五字或有卽五字之譌耳御覽八百三十引匹有五謂之束不誤

小爾雅義證卷十一

在爾雅東不難

說文解字不難音正字大海音正五律才難音曉義八百三十律公義

音音各宋玉玉篇音上難音已東結云已難十日音

俱音各二大音給音難一夫音難音一夫八音難一夫音難音

難音難不難東吳字山不主云已難十日音難音

難音云東吳字在詞義難十說難音音難音

易音東吳字音難音大下不難音云正已難東吳字音

難音

四音難音東吳字音難音

與音難八百三十律地音難音

難音

小爾雅義證卷十二

涇 胡承珙

廣量

一手之盛謂之溢

舊注滿一手也

儀禮喪服傳歆粥朝一溢米夕一溢米注云二十兩曰溢爲米一升二十四分升之一禮記喪大記注同儀禮釋文引王肅劉達袁準孔倫葛洪皆云滿手曰溢蓋據小爾雅似與鄭異案古量甚小漢二斗七升當今五升四合以古之五當今之一則溢爲米一升二十四分升之一不過當今二合稍贏一手所盛足有此數是王肅等所據與鄭注大略亦不甚相懸耳太平御覽八百三十引孔叢子曰一手之盛謂之溢

兩手謂之掬

舊注一升也

禮記曲禮受珠玉者以掬注云掬手中宣十二年公羊傳舟中之

指可掬矣何休注兩手曰掬案考工記陶人疏云小爾雅掬二升二掬爲豆豆四升四豆曰區四區曰釜二釜有半謂之庾據此足

知今本小爾雅此處必有脫誤蓋溢與掬皆爲量名掬即掬集韻或从手

故喪禮納財以一溢爲數鄭以粟米法計之爲一升二十四分升之一唐風椒聊篇先言盈升後言盈掬掬量當大於升但律度取法人身故以一手兩手約言之耳二升爲掬二掬爲豆賈所見本必當有異或今本一手兩手卽一升兩升之誤掬當本作掬御覽八百三十引作兩手謂之掬

掬四謂之豆豆四謂之區

案掬爲二升陶人疏所引二掬爲豆是也今本二誤爲四御覽八百三十引四掬謂之豆亦誤昭三年左傳注云四豆爲區區斗六升御覽八百三十引孔叢子曰豆四謂之區

區四謂之釜

舊注舊制四升爲豆四豆爲區區斗六升也四區爲釜六斗四升也齊陳氏以五升爲豆五豆爲區五區爲釜

十釜爲鍾  
與今同

昭三年左傳注云四區爲釜釜六斗四升考工記陶人爲甗實二  
鬴注云量六斗四升曰鬴案管子輕重篇云齊西之粟釜百泉則  
釜二十也齊東之粟釜十泉則釜二泉也據此釜之與區差以五  
倍則是五區爲釜非四區爲釜然據尹知章注云斗二升八合曰  
釜則區數本不同此蓋如今之斗斛同一名而各方大小或異耳  
莊子寓言篇釋文引小爾雅六斗四升曰釜與今本異按上下文  
例仍當以今本爲是御覽八百三十引作區四謂之釜

釜二有半謂之藪

舊注一斛  
六斗也

儀禮聘禮車乘有五藪注云藪數名也乘有五藪二十四斛也聘  
禮記十六斗曰藪注云今江淮之間量各有爲藪者今文藪或爲  
逾疏云逾卽庾也姜兆錫據考工記庾實二穀鄭注穀受斗二升  
則庾實二斗四升初非聘禮記十六斗之藪自後漢包咸注論語



以庾爲逾而晉杜氏之注左傳唐賈氏之疏聘禮記與考工及宋  
邢氏之疏論語遂展轉成誤云云今案考工記槩氏爲量煎金錫  
以爲之而陶人之庾與甌甑盆鬲皆瓦器或者用之以盛未必卽  
以爲量況陶人注云庾讀如請益與之庾之庾云讀如則陶人之  
庾非卽論語之庾明甚故賈公彥謂庾本有二法而孔穎達左傳  
疏亦云彼陶人所作庾自瓦器今甕之類非量器也與此名同而  
實異又案斲字玉篇先後切與庾字通乃古韻虞尤二部之合姜  
氏謂斲與庾文異音異誤矣御覽八百三十引孔叢子曰釜二有  
半謂之斲

斲二有半謂之缶

舊注四斛也

國語魯語出稷禾秉芻缶米莊子天地篇以二缶鍾惑而所適不  
得矣案此有半二字疑衍十六斗曰斲二斲爲三斛有二斗二缶  
則六斛有四斗正與鍾數合若如斲二有半則缶是四斛鍾是八

斛乃晏子所謂陳氏之量皆加一焉鍾乃大矣者是八斛之鍾非六斛四斗之鍾矣不應與上文豆區釜斂之量忽生異數故疑有半二字爲衍御覽八百三十引作數二謂之缶是也

缶二謂之鍾

舊注八斛也

昭三年左傳釜十則鍾襄二十九年左傳饋國人粟戶一鍾注云六斛四斗曰鍾淮南要略訓一朝用三千鍾贛高誘注云鍾十斛也此亦量數偶有異同耳御覽八百三十引缶二謂之鍾小爾雅舊注以缶爲四斛鍾爲八斛誤矣

鍾二謂之秉秉十六斛

儀禮聘禮記十斂曰秉注云秉十六斛案此文鍾二下疑脫有半二字蓋二鍾止十二斛八斗尙少三斛二斗正爲半鍾之數上文斂二下衍有半二字殆傳寫者衍於彼而遂脫於此與御覽八百三十引作鍾二有半謂之秉秉十六斛也

小爾雅義證卷十二

...

...

...

...

...

...

...

...

...

小爾雅義證卷十三

涇 胡承珙

廣衡

二十四銖曰兩

說文銖權十分黍之重也禮記儒行疏引算法十黍爲彙十彙爲銖漢書律歷志云兩者兩黃鍾律之重也二十四銖而成兩者二十四氣之象也淮南天文訓云秋分藁定藁定而禾熟律之數十二故十二藁而當一粟其以爲量十二粟而當一分十二分而當一銖十二銖而當半兩衡有左右因倍之故二十四銖爲一兩太平御覽卷八百三十引孔叢子曰二十四銖曰兩

兩有半曰捷倍捷曰舉

御覽八百三十引孔叢子曰兩有半曰捷倍捷曰舉

倍舉曰鈔鈔謂之鍰

舊注舉六兩鍰三兩

考工記冶氏重三鈞注云許叔重說文解字云鈞鍤也今東萊稱或以大半兩爲鈞十鈞爲鍤鍤重六兩大半兩鍤鈞似同矣則三鈞爲一斤四兩疏云鍤鈞輕重無文故王肅之徒皆以六兩爲鍤是以鄭引許氏及東萊稱爲證也書呂刑其罰百鍤僞孔傳六兩曰鍤釋文引賈逵說俗儒以鈞重六兩周官劔重九鈞俗儒近是疏云六兩曰鍤蓋古語存於今也考工記云戈矛重三鈞馬融云鈞量名當與呂刑鍤同俗儒云六兩爲一鈞不知所出耳鄭元云鍤稱輕重之名今代東萊稱或以大半兩爲鈞十鈞爲鍤鍤重六兩大半兩鍤鈞似同也或有存行之者十鈞爲鍤二鍤四鈞而當一斤然則鍤重六兩三分兩之二多于孔王所說惟校十六銖爾考周官職金疏引夏侯陽說云墨罰疑赦其罰百率古以六兩爲率

周本紀亦作率

廣曰率卽鍤也

據此知六兩爲鍤本尙書今文家說與小

爾雅合書釋文引徐邈云鍤六兩也其下卽云鄭及爾雅同或據

舜典疏引鄭駁異義及考工記注斷以爲鄭意必以鍤爲六兩大  
半兩今案鄭注尙書旣亡陸氏猶及見之或者呂刑注乃用六兩  
爲鍤之說故釋文云然據大傳云一鍤六兩鄭注云所出金鐵也  
死鼻出三百七十五斤用財少爾此注明從六兩爲鍤之說同注  
經傳不應異訓賈逵習古文者所云俗儒猶言今儒非雅俗之謂  
也御覽八百三十引孔叢子曰倍舉曰鍤鍤謂之鍤

### 二鍤四兩謂之斤

漢書律歷志十六兩爲斤斤者明也三百八十四銖易二篇之爻  
陰陽變動之象也十六兩成斤者四時乘四方之象也淮南天文  
訓云天有四時以成一歲因而四之四四十六故十六兩而爲一  
斤御覽八百三十引孔叢子曰二鍤四兩謂之斤

斤十謂之衡衡有半謂之秤

舊注秤十五斤

案秤俗字當作稱御覽八百三十引孔叢子曰斤十二謂之衡衡

有半謂之稱斤十下衍二字

稱二謂之鈞

舊注鈞三十斤

說文鈞三十斤也周官大司寇入鈞金注云三十斤曰鈞漢書律歷志云鈞者均也陽施其氣陰化其物皆得其成就平均也權與物均重萬一千五百三十銖當萬物之象也四百八十兩者六旬行八節之象也三十斤成鈞者一月之象也淮南天文訓云三月而爲一時三十日爲一月故三十斤爲一鈞御覽八百三十引孔叢子曰倍稱謂之鈞

鈞四謂之石

漢書律歷志四鈞爲石者四時之象也重百二十斤者十二月之象也呂氏春秋仲春紀鈞衡石高誘注云石稱也石百二十斤淮南天文訓云四時而爲一歲故四鈞爲一石御覽八百三十引孔叢子曰鈞四謂之石

石四謂之鼓

禮記曲禮云獻米者操量鼓荀子富國篇瓜桃棗李一本數以盆鼓管子樞言篇釜鼓滿則人概之地數篇民自有百鼓之粟者不行案此諸書言鼓者皆是量各禮記釋文引何氏隱義樂浪人呼容十二石者爲鼓管子尹知章注云鼓十二斛喪服傳疏云依算法百二十斤曰石則是一斛據此則十二斛當有一千四百四十斤廣雅又云斛謂之鼓亦量名耳若衡數則四石爲四百八十斤昭二十九年左傳遂賦晉國一鼓鐵疏引服虔以爲量名而謂金鐵之物當稱之以權衡數之以鈞石不當用量故杜以爲賦晉國者令民各出功力均賦取其功也冶石爲鐵用橐扇火動橐謂之鼓今時俗語猶然令某人鼓石爲鐵計令一賦使足故云賦晉國一鼓鐵也今案左氏之鼓自是衡名當卽石四爲鼓之鼓四百八十斤之鐵足以成鼎王肅注家語正論篇趙簡子賦晉國一鼓鐵



云三十斤謂之鈞鈞四謂之石石四謂之鼓正用小爾雅此文服氏以爲量鼓者非杜氏以爲鼓鑄之鼓尤非也御覽八百三十引孔叢子曰石四謂之鼓然則鼓四百八十斤也此與廣量篇鍾二謂之秉秉十六斛也文例正同今本脫一句

小爾雅義證卷十三

小爾雅補遺

涇 胡承珙

枉謂之梏械謂之桎

周易蒙釋文引小爾雅

案閩本明監本釋文俱作廣雅宋本作小爾雅今廣雅小爾雅皆無此語姑存之

桑土桑根也

詩豳風釋文云桑土桑根也小雅同

案唐人諸書引小爾雅者多省文作小雅此云小雅同者疑亦小爾雅有此語也

祭山川曰祈沈

考工記玉人釋文引小爾雅曰祭山川祈沈案爾雅祭山曰庶縣祭川曰浮沈祈音九委反今讀宜依爾

雅音

案爾雅庶縣浮沈郭注或庶或縣或浮或沈各分爲二據釋文引

小爾雅祈音九委反是以祈爲庶於庶縣浮沈各舉其一與玉人

合儀禮祭川沈周禮大宗伯以狸沈祭山林川澤鄭注祭川澤曰

沈皆言沈不言浮管子山高而不崩則祈羊至矣淵深而不涸則

沈玉極矣曰祈曰沈正與小爾雅同也

淫過也

文選上林賦七發李善注並引小爾雅

或謂廣詁云經屑省過也經當爲淫未知是否

分次也

文選魯靈光殿賦注引小爾雅

碩遠也

一切經音義卷二引小爾雅

廣橫也

一切經音義卷二引小爾雅

通五色皆曰繒

一切經音義卷六引小爾雅

史記楚世家楚武公曰居三代之傳器吞三翮六翼以高世主索隱云翮亦作翮同音歷三翮六翼亦謂九鼎空足曰翮六翼卽六耳翼近耳旁事具小爾雅

段氏玉裁曰翮者翮之假借字翼者鈇之假借九鼎欸足者三附耳於外者六也案段以事具爾雅謂卽爾雅釋器鼎欸足謂之高

附耳外謂之鈇之文然索隱明有小爾雅字疑廣器章本有其文而今脫之翼鈇字通書多士敢弋殷命馬鄭王本皆作翼是其例漢書郊祀志鑄九鼎其空足曰鬲巨象三德空足卽爾雅之欵足欵空雙聲此翻與鬲同三翻謂三足也墨子耕柱篇和氏之璧隋侯之珠三棘六異此諸侯之所謂良寶也三棘六異疑爲三翻六翼之異文當亦謂九鼎也

史記范雎蔡澤列傳或欲大投或欲分功索隱云言夫博弈或欲大投其瓊以致勝或觀其勢弱則投地而分功以遠救也事具小爾雅史記馮唐傳百金之士十萬注服虔曰良士直百金也或曰直百金言重索隱曰晉灼云百金喻其貴重也注云或者服晉之說也劉氏云其功可賞百金者事見管子及小爾雅

案以上二條索隱本或作爾雅無小字

區域也

後漢書方術傳注引小爾雅

盥澡也洒也

莊子寓言篇釋文引小爾雅

小爾雅補遺